

Rómu

Ísu wíyómpa'a iyówana Póro moórá-waai úmai afakaeté-aataiya'iyó miyáumai-aatai maisuwéna Kórinti-naopa'a ména maanáái agaimái Rómu-naopa'o méron-kwaasi agaimái moórá-ininkon-awi'a Fípimba amúwana mátímakaiye. Rómu-naopa'a kámáni-waasiti aifa'-náópa'a Ítáári-marafa'a wéron-daopa'an-iyé. Póro Rómu-naopa'a wínena póna Ísuni aampa'ó kun-kwáásímbá kísau máinena póna miwí túwa'nai e'a to'mayaa uwátinkanae séna maarán-áái agaimái Fípimba amúwana mátímakaiye. Yúndaa-waasiye fí'onkaa-waasiye seyaafá'nánká sáwí'o úmaesamo

nú-fasi'aenko ta'ótokowana Ísun-aaisafesa timankúnkúmbo owí aantentafena arupíse úmai méraawe Maníkó siyáiyé. Sáwí'o úmaesamo nú-fasi'aenko ta'ótokaimpinkemba Maníkóní ámutankoma faútínkáísasa Ísuwe'a kááísamai aúí'a úmai méraawe. Maníkóní áamáánkoni kísau-aaiwara'a agaimái amúwana mátímakaiye.

¹ Kemá Póro Ísu Káráísitini kísau-waasigo é'a maanáái agai-timúmpo isáaro. Maníkó kembá aantá-waasi sí'marena séna kesí ásé-aai kosimátíma'mae núwo séna si'mákaiye.

² Naaófá'á Maníkó wenáái simátímakowisafena minásé-áái símai fasi'ámakain-aai súwasa aúfáí-wandaaifimba agaimakáawe.

³ Minásé-áái Maníkón-ááninko kentáásí Fasi'aénkó Ísu Káráísitintafesa símai

agaimakáawe. Wemá waásimo kunúkáiмба óraakon-awi'a Téfitin-aísaafitantambo uráiwain-iyé.

⁴ Wení ámútanko Maníkómpákémbá póna Maníkó wembá pukáimpinkemba íyáfasinankaraintafeta minóráá-fásí'áémbá awánéta séta Maníkón-ááninkon-iyé súne.

⁵ Fí'o-fi'om-barafaken-kwaasi wenááisafesa timankúnkúmba ésa taawiyafiyantafena Maníkó Káráísitimba imáyáa amúwana kentáféna séna kesáái kosimátíma'mae núwo séna kawé-kísáú símakaiye.

⁶ Ísu Káráísitini waási-i'a íyantafena Maníkó táántena kembiwí Rómu-naopa'o méraawiwara'a táántaraiye.

⁷ Minááisáfé'a imáyáa é'a maanáúfái agaimaráúmpo ísáaro. Kembiwí Rómu-naopa'o méraawi Maníkó wenarumbá tiména wení waási-i'a íyantafena táántaraiwai ísáaro. Maníkó kentáásifowawe Fasi'aénkó Ísu Káráísitiye úwoi túwa'nai esarai farumó uwátinkaayantafe'a inái súne.

Rómu-naopa'a kónaemo siyáin-ai.

⁸ Kembiwí Ísu Káráísitimpa'a timankúnkúmba on-ááígó seyaafá'-áémpá'-wáásífá'á wété isasá ísááwa'a Ísu Káráísitini kísausafe'a imáyáa é'a Maníkómpá'á súwi súne.

⁹ Maníkóní kísau fasi'ámai maé'a ááninkoni ásé-ai simátíme'a kembiwísáfé'a inái símae'o iyúnda Maníkó wéisaiye.

¹⁰ Kempá'ó ímbo kúndasafe'a sé'a Maníkómpá'á áísai úmae iyé'a arááímo táínamo e aambá

wisínkéna'a Rómu-naopaken-kwaasise'a koméraano sune.

¹¹ Maníkóní ámútanko súwa'nai isa'á kotúwa'nai ona'á wenááisafe'a fasi'ámai imáyáa íyantafe'a kempá'á kónae sé'a úne.

¹² Miyámó ína'o é'a kembiwí túwa'nai ona'á kembá súwa'nai ónááwe. Ísu Káráisitintafe'a imáyáa é'a túwa'nai ona'á kembá miyá ónááwe.

¹³ Kesí waásisono. Kempá'ó ímbo kúndasafe'a sáwí-imayaa ofáínifo maanáái ísáaro. Sáwífa-kanaa kónae sé'o únda moórátantaako ta'ótóráísa'a méraumne. Fí'onkaa-waasifimbo Maníkóní aambó aráátimewanasamo arááiwaéntemba kembiwí fí'onkaa-waasi owa'á miyá ónae sé'a úne.

¹⁴ Maníkó súwa'nai uráintafe'a sáwífa'-waasi óraa'-naopa'e kári'-naopa'e seyaafá'-ááímó ísaraawiye ímbo ísaraawiye túwa'nai onó.

¹⁵ Miyámó únda Rómu-naopa'o méraan-kwaasi áse-aaí kosimátimenae sé'a úne.

Ásé-aaigoni fasi'aén-áái.

¹⁶ Ásé-aaisafe'o ímbo sigaesáf'e'o únda maarán-ááín-íye. Ásé-aaisafesa timankúnkúmbo owí Maníkó wení fasi'aéntámbá miwítí sáwí-imayaagomo ta'ótokaimpinkemba wéfautinkaiye. Aifa'á Yúndaa-waasi ísaraawasa ánaaemba fí'onkaa-waasi wéisaawe.

¹⁷ Ísu Káráisitín-aaisafetaamo érai'emo séta simankúnkúmbo úndasafenasa mindásafena aantemba Maníkó séna arupíse úmai méraawe sisatá wenaúranka'a arupíse úmaisa méraumne. Ásé-aaifinkemba miyán-ááísá ísaraumne. Mindásafena naaófá'á Maníkón-aaí aúfáífimba agaimaréna séna

Maníkón-aaisafesa érai'emo sésamo
 timankúnkúmbo owísáféna Maníkó séna
 arupíse úmai méraawe simbá pósa
 aúí'a úmai méranaawe
 agaimaréna siyáíye.

Maníkómbá tínaaembo uwámakaan-aai.

¹⁸ Maníkó maanáái aráásímakaiye. Marapákén-
 kwáási sáwí-imayaa ésa sáwí'a ésa miyámó ombá
 Maníkóní érai'-aaigoni aambá fáí'makaamba
 póna Maníkó áyámba éna wíyómpakemba sáwí-
 meyamba timíníye.

¹⁹ Maníkóní áwáuma ímba aúpá'á wéraifo
 afora'á aráátímakaimba marapákén-kwáási
 awánésa ímba imáyáa uráamba póna sáwí-
 meyamba timíníye.

²⁰ Maníkó maramó úmaron-kanaarakemba
 kífé'wara'a Maníkóní áwáuma awánésa wení
 fasi'aémbó waé'wae'o i-fási'áémbá kawel'-
 úmai awánésa Maníkón-ane'á túrantamba ímba
 wéawanaafo wení áwáuma é'a wéisaawe. Maníkó
 úmakain-tantaa'a awánésa pósa wemó mérain-
 aai kanaa'á wéisaawe. Mindásafesa sáwí'o ombá
 miwítí áwáugo isasá sáwí'a wéowe.

²¹ Maníkó mérain-aai ísaraambanifo ifátuwesa
 wenáwí'o mósá marésamo érai'a méraiye
 seraámbá ímba mósá marésa súwi ímba sésa
 ifátuwesa kaentaén-ímáyáá ésa kumeu'ó in-
 áémpá'-ímáyáá ésa

²² karo'á sésa kawel'-ímáyááwárá'-wáásísá úne
 sembánifo sáwí-imayaawara'-waasi ésa

²³ Maníkó maé'mae'o iwáín-ímáyáá ímba
 mósá marésa waási áuwawaakaamba numamá
 wai-waamba iyaankafayaambá úmakesa
 mintántáákóntáfésa imáyáa mósá wémaraawe.

24 Waási miyá-sáwí'ó ontáféna Maníkó ánaaemba uwátimena séna sáwí-imayaasafe'o tirááísafe'o iyamba úwoi miyán-oro siyáísasa miwí keyáárika'a miwí túma sáwí'a wéowe.

25 Maníkón-aai érai'-aai taraisésa

karo'-áái arááiwaesa Maníkó seyaafá-tántáá'ó úmakaiwaintafesa ímba imáyáa mósá marésa wení kísau ímbo máémba wemó uráin-tantaakontafesa imáyáa mósá marésa mintántáákóní kísau wémaewe. Maníkón-áwí'-aantembo mósá márááraamba érai'a mindá ímba mósá wémaraawe.

26 Waási miyá-sáwí'ó ontáféna Maníkó ánaaeni'a uwátimena séna sáwí-imayaasafe'o tirááísafe'o iyamba úwoi miyán-oro siyáísasa aaré tuwaai'waimbá tiyuwésa keiyái kesuwaainíné sisaná kesuwaai'é sésa sáwí'a úmae nówasa

27 waaí miyáumai tuwaainíntómbá tiyuwésa keiyái kesuwaainí kesuwaainíné símaesa wénesa miyá-sáwí'á úmae wénontafena Maníkó miwí túra'a sáwí-meyamba arupíse úmai wétimiye.

28 Maníkó wenáái érai'-aai taráísóntafenawe séna ánaaemba uwátímísana miwítí sáwí-imayaago táái téna isasá kentí imáyáafinkení'o ombá uwófi'a wéowe.

29 Fí'lo-fi'lo-sawi-imayaago miwífímbá óraa'a isasá sáwí'o ombá ímba saagésa túraniyamba ésa sáwí'a uwátinkesa kawé-kísáúmó máéntafesa tirunkó símai sáwí'a uwátinkesa tínkamowasa púwówasa aaisambá sésa karo'á simátiyuwesa símai sáwí'a uwátinkesa tíyo-aai símae nésa

30 túwí'a kumínkwae sésa karo'-áái sésa Maníkómbá tíyamba uwánkesa sáwí'-aai

simátinkesa karo'á sé'a óraa'-waasisa úne sésa túma maimaé iyésa aú-sawi-kisau maénae sésa miyá ésa tinófoi-taai taraisésa

³¹ tirumpimbá kawel'-áái ímba wéraisasa símaimo fasi'ámakaini'a ímba ésa miwítí waási-ímayaa ímba ésa tirumbá ímba uwátinkesa miyámó ombá

³² Maníkó áamáamba símarena séna miyá-sáwí'ó owí puwónááwe siyáimba isésa ímba ifátúwáamba miyá úmae iyésa ímba saagésa miyámó owísáfésa aamoín-owe.

2

Maníkó aaifimbó wémaitinkain-aaí.

¹ Tuwímbai tuwánésa sésa sáwí'ó owí sáwí-meyamba maenááwe sewí simátiménda isáaro. Miyámó sembá kembiwíwará'á miyá-sáwí'ó ombá póna aaifimbá maitinkáína'a sáwí-meyamba maenááwe.

² Miyá-sáwí'ó owí Maníkó aaifimbá maitinkéna sáwí-meyamba tímimba wemó arupíse úmaimo miyámó in-ááísá ísaraumne.

³ Tuwímbai tuwáné'a sé'a sáwí'ó owí sáwí-meyamba maenááwe sembá miyá-sáwí'á ombá pó'a Maníkó aaifimbá ímba maisinkéna sáwí-meyamba simíniye ímba seró.

⁴ Sáwí'a owaná Maníkó arumbá uwátinkéna ímba ááéma sáwí-meyamba tímimba timu'maréna méraiye. Mindásafe'a sáwísamban-iyé ímba seró. Sáwí'ó ombá tuwé'a Maníkómpá'á tíyantafena arumbá uwátinkéna timu'maréna méraiye.

⁵ Énifo kemá tirunté'a maré'a sáwí'ó ombá ímba tuwé'a Maníkómpá'á ímba wétewe. Miyá-sáwí'ó

úmae íyóntafena Maníkómó aaisambó sénamo arupíse-sawi-meyambo timínda-kanaa tínana Maníkó áfááraumai sáwí-meyamba timínana óraa'a íníye.

⁶ Minkánaá tínana seyaafá'nánká miwítí kísausafena kawe'-méyáné sáwí-meyane anondáá timíníye.

⁷ Kawe'á úmae iyésa sésa Maníkó kentáá súwí'a mósá maréna sámkasinkenasa maé'mae'o onda-íta uwásinkainiye sewí Maníkó aúí'a úmai maé'mae'o íyani'a uwátinkainiye.

⁸ Kesáfé-ímáyáá aantemba ésa kawe'-áái tíngaeni'a uwámesa sáwí-aaí arááíwáéwi Maníkó áfááraumai aaisambá tiyéna sáwí-meyamba timíníye.

⁹ Sáwí'o owí Maníkó tí'a índa-i'a uwátinkena umbai-tántáá'á tiména Yúndaa-waasiye fí'onkaa-waasiye miyá éna

¹⁰ kawe'ó owí Maníkó sámkatinkena túwí'a mósá maréna aáno uwátinkena Yúndaa-waasiye fí'onkaa-waasiye miyá éna

¹¹ ímba tuwínkaa'-úmai-meyamba timínífo arupíse úmai-meyamba timíníye.

¹² Fí'onkaa-waasi Maníkó naaófá'ó Mósesembo simámakain-amaamba ímba isésa sáwí'o ontáféna méraawini áwáuma Maníkóní némpa'a maé'mae'a ónááwe. Yúndaa-waasi Maníkó Mósesembo simámakain-amaambo isésamo taráísóntafena Maníkó minámáánkóní áwáuwara'a aaifimbá maitinkáíniye.

¹³ Maníkó Mósesembo simámakain-amaambo isésamo ímbo arááíwaiyanamo éna Maníkó arupíse úmai méraawe ímba síníye.

¹⁴ Maníkó fí'onkaa-waasi

wení áamáamba ímba simátimakowasa miwítí imáyáafinkembo minamáámbó arááiwaesamo ombá minamáámbó ísaraan-kwaasiyaamba wéowe.

¹⁵ Miyámó ombá Maníkóní áamáamba miwítí imáyáafimba wéraisasaraamba méraawana tirumpimbá aaí wéna kawé'ó ontáféna minááígó séna kawé'an-owe séna sáwí'o ontáféna sáwí'an-owe wésiye.

¹⁶ Moórá-kanaamo títanamo éna Maníkó Ísu Káráísitintaféna sínana wemá waásiti imáyáa aúpá'-imáyáa tuwímbarena aaifimbá maitinkáíniye. Ásé-aaimo simátimunda minááíwará'á simátimune.

Yúndaa-waasi Maníkóní áamáamba tokáundasa póna súwa'nai iyemo siyáan-aaí.

¹⁷ Yúndaa-waasisa únemo sewí ísáaro. Maníkó Mósesembo simámakain-amaamba ísaraundasa póta kawé'-úmaisamo méraundasa Maníkóní waásisa úne sé'a kentúma mósá wémaraawe.

¹⁸ Minamáámbá ísaraantafe'a Maníkómbó arááimo tainí'o on-áái isé'a kawé'ó on-tántáá'é sáwí'o on-tántáá'é kanaa'á tuwímbare'a

¹⁹ óraaka sé'a kawé'-ámbó ímbo awánaraan-kwaasi kanaa'á aráátimeta kumeu'-áémpá'ó méraan-kwaasi kanaa'á sama kátinketa

²⁰ táá'o ímbo ísáan-kwaasi aráátimeta iyámpóíyaambo on-kwáásí aráátimune wésewe. Maníkó Mósesembo simámakain-amaamba ísaraantafe'a imáyáa é'a sé'a seyaafá'-áái iséta érai'-aaisa sune-imayaa é'a pó'a miyán-áái wésewe.

21 Tuwímbaimo aráátimemba kembiwíwará'á mináái arááiwaéro. Umémhá ímba orómó semhá kembiwíwará'á ímba miyán-oro.

22 Aare-úméné waai-úméné ímba orómó semhá kembiwíwará'á ímba miyán-oro. Karo'-máníkó sáwí-tantaa'a iyémó semhá kembiwíwará'á sáwí'a é'a minkáro'-máníkóní naaúmpa'o sáwí'o ombá mindá ifá'á túwáaro.

23 Maníkó Mósesembo simámakain-amaanta ísaraumne sé'a kentúma mósá máraámbanifo minamáámbá taraisé'a sáwí'o ombá waási tuwánésa sésa Maníkón-áwí'a sáwí'a uwánkááwe wésewe.

24 Mindásafena naaófá'á Maníkón-aai aúfáífimba agaimaréna séna Yúndaa-waasi sáwí'o ontáfésa fí'onkaa-waasi tuwánésa Maníkómbá símai sáwí'a wéuwankaawe agaimaréna siyáíye.

25 Yúndaa-waasi ontáfé'a túma kárámai araénáémba wée'a sé'a Maníkóní waásisa únemo sewí Maníkó Mósesembo simámakain-amaamba arááiwaémba Yúndaa-waasi ombá mindá kawé'a uwátínkáífo minamáámbá ímba arááiwaémba Yúndaa-waasi é'a túma kárámai araénáémba uráamba mindá ímba kawé'a uwátínkáísa'a úwoi-waasiyaamban-owe.

26 Fí'onkaa-waasi ímba túma kárámai araénáémbo

owí Maníkó Mósesembo simámakain-amaamba arááiwaéewanamo ímba Maníkó séna Yúndaa-waasiyaamba é'a túmo kárámaimo araénáémbo owíyáámbá é'a kesí waásiyaamban-owe wésiye.

27 Maníkó Mósesembo simámakain-amaamba agaimarówa'a Yúndaa-waasi isé'a túma kárámai araénáémba uráambanifo minamáámbá

taráíyaamba pósa fí'onkaa-waasi ímba túmo kárámaimo araénáémbo owí minamáámbá arááiwaéwimo ésa aaifimbá maitinkánááwe.

²⁸⁻²⁹ Túmo kárámaimo araénáémbo owí mindásafena aantemba ímba Yúndaa-waasi Maníkóní waási-úramban-ofo Maníkóní ámútanko miwítí sáwí-imayaa maitiyukaiwai Yúndaa-waasi Maníkóní waási-úramban-owe. Agaimakáin-amaanko ímba miyá uwátinkáifo Maníkóní ámútanko miyá wéuwatinkaiye. Miyámó on-kwáásísáfésa fí'on-kwaasi ímba aamoí wéuwatinkaafó Maníkó aantemba aamoí wéuwatinkaiye.

3

¹ Ímba fí'onkaafimban-ifo Yúndaa-waasifimba nóran-kawe-tantaara paápé uráiyó. Túmo kárámaimo araénáémbo uráamba mindá nóran-kawe-tantaara paápé uráiyó sembó

² síesai íya'lo é'a anondáá sé'a kawé-tántáá'á paápé éna aifa'á Yúndaa-waasi Maníkón-aaimo ta'ótoraiyantafena simátímakaiye sénaumne.

³ Simátímakaimbanifo tuwímbai Maníkóntáfésa ímba imáyáa ésa wenáái ímba wétaawiyafowe. Miyán-ofo Maníkó ímba miyá éna wemó siyáintemba éna símai fasi'ámakaintemba wéiye.

⁴ Waási karo'-áái wésefo Maníkó érai'-aai aantemba wésiye. Maníkóntáféna símai aúfáífimba agaimaréna séna

enááigo érai'-aai aantemba isasá waási ísaraawe.

Ímba kanaa'á aaifimbá maenkánááfo enááigo seyaafá'-wáási táái wéiyaakaiye

agaimaréna siyáiyé.

⁵ Kesáámó sáwítaamo úndafinkemba Maníkóní kawe-kísáú afora'á wéráintafeta sáwíta únanasa Maníkó sáwí-meyamba simímba sáwí'a iyésá ímba senó. Miyán-áái waásiti imáyáafinkemban-ifo ímba miyásá senó.

⁶ Maníkómó ímbo arupíse úmaimo mérainkakaa ánaaemba seyaafá'nánká'ó méraawini áwáusafena ímba tísai isinó.

⁷ Moórá-aai ísáaro. Kesáámó karo'-ááímó súndafinkemba Maníkóní érai'-aai afora'á paápé isaná wenáwí'a mósá óraa'o intáféta kesáámó sáwí'o úndasafenasa Maníkó aafimbá maisínkáímba sáwí'a iyésá ímba senó.

⁸ Miyán-káro'-ááímó sembá mimpínkémbá sésa kesáámó sáwí'o úndasa mimpínkémbá kawe-tántáá'á paápé ínana Maníkón-áwí'a iyíníye ímba miyán-áái seró. Tuwímbai kesúwí'a sáwí'a uwásinkaiyantafesa kentáfesa karo'á sésa miyán-áái siyé wésefo Maníkó miwí aafimbá maitinkéna arupíse úmai sáwí-meyamba timíníye.

Seyaafá'-wáásí ímba arupíse úmaimo méraan-aai.

⁹ Kemá Póro mináái imáyáa é'a sune. Maníkón-aúranka'a ímba maarán-íye. Yúndaa-waasiya kawe'-wáásísá únasasa fí'onkaa-waasi sáwí-waasi owémá ímba miyán-ifo é'a siyáumne. Sáwí-imayaago seyaafá'nánká ta'ótokaiye sune.

¹⁰ Mindásafena Maníkón-aai aúfáífimba agaimaréna séna

Maníkón-aúranka'a seyaafá'nánká ímba arupíse úmai méraawe.

11 Énifo seyaafá'nánká'ó arupísemo í-tántáá'á ímba kawe'-úmai awánésa Maníkóe'a méranae ímba wésewe.

12 Seyaafá'nánká Maníkómbá tínaaemba uwámesa sáwí-amba arááiwaesa kosaambaí ésa ímba kawe'á wéowe.

13 Waási puwésamo kawáá'o ontembá miwí tááigo miyá isasá karo'á simátiyuwaawana miwí tááigo waaifainkómó waásimo ukútíntemba isasá

14 óraa'a símai sáwí'a uwátinkesa

15 ááéma tínkamowasa púwówi mésa

16 nópa'o tí'o úní'a úmai

umbai-tántáá'á tímésa

17 ímba faru uwátinkesa

18 Maníkón-áároí ímba inkaisésa ifátuwesa méraawe agaimaréna siyáíye.

19 Maníkó seyaafá'-márafákén-kwáásísáféna áamámba séna mináái arááiwaéro siyáimbanifo taraiséta seyaafá'nánká Maníkón-aúranka'a sáwí'a éta súnda arupíse úmaisa méraumnesa ímba érai'a súne.

20 Maníkómó siyáin-amaamba wéraisata seyaafá'nánká ímba érai'e séta seyaafá'-ámáámbá arááiwaundasa póna Maníkó kentáásáféna séna arupíse úmai méraawe síníye súndasa karo'-ááísá súne.

Áamámba iséta sáwí'a uráumnesa súne.

Ísun-aaisafesa tímankúnkúmbo owí Maníkó arupísemo uwátínkáín-aai.

21 Maníkó aú-amba aráásimenasa Maníkón-aúranka'o waásimo arupísemo uwátínkáín-amba aráásimenasa wemó siyáin-amaamba

ímba imáyáa éna minámbá aráásímakaiye. Minááisáfésa naaófá'á Mósesee Maníkón-aai simátímakowiye minámbá paápé índa-aai simátimesa agaimakáawe.

²² Waási Ísu Káráísitafesa sésa érai'a kentáási sáwí-imayaafinkemba awásiyukaiye sewaná miwísáféna Maníkó séna arupíse úmai méraawe wésiye. Ísu Káráísitin-aaisafesa timankúnkúmbo owí Maníkó arupíse uwátínkáimba mimbórá-ámbá wéraiye.

²³ Seyaafá'nánká sáwí'a ésa Maníkómbó arááimo táínda-i'o úmaimo ménaesamo ombá káfé'a ímba miyáumai méraawana póna

²⁴ Maníkó úwoi túwa'nai ena arumbá uwátínkáísana Ísu Káráísiti miwítí sáwí-imayaagomo ta'ótokaímpinkembo awátinkena Maníkón-aúranka'a arupíse uwátinkaindasafena pukáíye.

²⁵ Maníkó séna sáwí'o om-béyámbá maitiyuwáíndasafena Ísu Káráísiti puwínana wení naaemá kumíníye siyáimba minááisáféta séta érai'a miyán-íye súndasafenasa kentáási sáwí-meyamba wémaisiyuwaiye. Ááemo sáwí'o uráamba Maníkó ímba ááema sáwí-meyamba tiména wemá arupíse ímbá awánáiyantafena séna ánaaemba Ísu Káráísiti puwéna miwítí sáwí-meyamba maitiyuwáíníye siyáíye.

²⁶ Káfé'a Maníkó arupísemo ímbá awánáiyantafena waásimo sáwí'o ontáféna imáyáa éna maará wéíye. Ísu Káráísiti miwítí sáwí-meyamba maitiyúwáín-aaisafesa timankúnkúmbo owí Maníkó wenaúranka'a

arupíse wéuwatinkaiye.

²⁷ Miyáumai kesúsa maimaétaamo iyóndasa kentááfimbá ímba wéraiye. Ímba kentáási kawe-kísáúsáfénan-ifo Ísu Káráísitin-aaisafeta simankúnkúnta úndasafena mindásafena aantemba Maníkó wenaúranka'a arupíse wéuwasinkaiye. Miyáumai kesúsa maimaétaamo iyóndasa kentááfimbá ímba wéraiye.

²⁸ Simátimunda érai'-aain-iyé. Maníkóní áamáanta ímba arááiwaundasafenasaan-ifo wenááisafeta simankúnkúnta úndasafenasa Maníkó wenaúranka'a arupísesa wéuwasinkaiye.

²⁹ Ímba Yúndaa-waasi aantembanifo fi'onkaa-waasiwara'o túwa'nai índasafena Maníkó méraiye.

³⁰ Mimbóráwígó Maníkó ména Yúndaa-waasisa wenaúranka'a arupíse uwásinkenasa fi'onkaa-waasiwara'a miyá wéuwatinkaiye.

³¹ Wenááisafeta simankúnkúmbo úndasafenasa Maníkó arupíse uwásínkáísata miyáumai Maníkóní áamáamba ímba tuwéta minámáánkóní áwáuma awánéta wéaraaiwaumne.

4

Émbaramu Maníkón-aaisafena amankúnkúmbo úntafena arupíse úmai méraanemo Maníkó siyáin-aai.

¹ Émbaramu Yúndaa-waasisa síwá'náma wenááimo simátíménda ísáaro.

²⁻³ Maníkón-aai aúfáíimba agaimaréna séna Émbaramu Maníkón-aaisafena érai'emo sénamo amankúnkúmbo uráintafena Maníkó séna arupíse úmai méraane siyáíye

agaimaréna siyáíye. Émbaramuni kawe-kísáúsáfénamo Maníkómó sénamo arupíse úmai méraane siyáinkakaa Émbaramumo wení kisausafenamo áúma maimaéna iyúmba wéraisino. Émbaramu Maníkón-aaisafena érai'e siyóntafena Maníkó séna arupíse úmai méraane siyáimba mindásafena Maníkón-aúranka'a Émbaramu áúma maimaéna iyúmba ímba wérombaniye.

⁴ Moórá-aai isáaro. Moóráwigoni kisaú wémaewana méyámbó tímimba ímba úwoi wétimifo miwítí kisaú awánéna méyámbá wétimiye.

⁵ Maarán-áái érai'-aain-iyé. Kawe-kísáú mó maúndasafena arupíse úmai méraawe-aai Maníkó ímba wésifo Maníkón-aaisafeta simankúnkumbo úndasafenasa Maníkó séna arupíse úmai méraawe wésiye. Sáwí'o uráundasaamo arupísemo uwásínkáinta Maníkón-iyé.

⁶ Kawe-kísáú mó máéntafena Maníkó ímba imáyáa wéifo Maníkón-aaisafesamo érai'emo sentáféna imáyáa éna arupísemo uwátínkáíwain-iyé Maníkó sisaná miwí tirunkó kawé'á wéíye. Minááísáféna naaófá'á Téfiti aúfáífimba agaimaréna séna

⁷ Maníkó sáwí'o owítí sáwí-imayaa maitiyuwéna ímba imáyáa úmae íyísana tirunkó kawé'á wéíye.

⁸ Sáwí'o owí Maníkó ímba imáyáa úmae íyísana tirunkó kawé'á wéíye agaimaréna siyáíye.

9 Mináái túmo kárámaimo araénáémbo uráawi Yúndaa-waasisafena aantemba ímba siyáifo ímbo túmo kárámaimo araénáémbo uráawisafenawara'a Téfiti séna miwítí sáwí-imayaawara'a maitiyúwáísana tirunkó kawé'á wéiye-aai siyáíye. Fí'omba mináái

sé'a Maníkón-aai aúfáíimba agaimaréna séna Émbaramu Maníkón-aaisafena érai'emo sénamo amankúnkúmba uráintafena Maníkó séna arupíse úmai méraane siyáíye

agaimaréna siyáíye.

10 Émbaramu áuma ímba kárámai araénáémbo urónka'a Maníkó wentáféna séna arupíse úmai méraane séna

11 Maníkón-aaisafena érai'e séna amankúnkúmba úntafena arupíse úmai méraandawi ómpo enáúma kárámai araénáémbo uwó súwana miyá uráíye. Miyáumai túmo ímbo kárámaimo araénáémbo uráawiwara'a Maníkón-aaisafesa érai'e sésa timankúnkúmba ontáféna Maníkó séna arupíse úmai méraawe wésiye. Miwí Émbaramumo miyámó uráintemba Maníkón-aaisafesa timankúnkúmba ésa pósa Émbaramuntafesa kentáá síwá'náraamban-iye wésewe.

12 Súmo kárámaimo araénáémbo úndawisa wemá kentáá síwá'náma iyésá sune. Ímbo súmo kárámaimo araénáémbo úndasafeta aantembanifo Émbaramumo miyámó uráintemba Maníkón-aaisafeta simankúnkúmba úndasafetaawe Émbaramuntafeta kentáá síwá'náma iyésá sune. Émbaramu áumo ímbo kárámaimo araénáémbo urónka'a Maníkón-aaisafena amankúnkúmba éna ména póna

Yúndaa-waasiye fí'onkaa-waasiye Maníkón-aaisafesa timankúnkúmba owí tíwá'nán-iyé.

*Maníkón-aaisafesa timankúnkúmba owí
Maníkó símai fasi'ámakaimbo timínda-aai.*

13 Naaófá'á Maníkó Émbaramuntafena símai fasi'ámakon-aai séna ewé enaísaafitantambo iyawiye seyaafá'-máramá kentí maramá wéraiye siyáiyé. Ímba Émbaramu Maníkóní áamáamba arááiwakontafenan-ifo amankúnkúmba úntafena aantemba Maníkó séna arupise úmai méraane súmbanifo Maníkó Émbaramuntafena símai fasi'ámakon-aai siyáiyé.

14 Maníkó símai fasi'ámakon-aai Mósesembo simámakain-amaambo arááíwáéwisafena ímba siyáífo Maníkón-aaisafesa timankúnkúmba owísáféna siyáiyé. Miyámó ímbo uráinkakaa Maníkón-aaisafesa timankúnkúmba owí úwoisafesa owisinó. Maníkó símai fasi'ámakaimba úwoisafena sisinó.

15 Ámáán-aai wéraisasa taráíyaantafena moórá-amba Maníkómó aaisambó sénamọ sáwí-meyambo timínda-amba paápé uráiyé. Ámáán-aaimo ímbo wérainkakaa ímba taráísísina áamáán-aai wéraiye.

16 Émbaramu Maníkón-aaisafena amankúnkúmba úntafena símai fasi'ámakon-aai siyáiyé. Miyáumai Émbaramun-aísaafitantambo iyawi Maníkón-aaisafesa timankúnkúmba iyawi Maníkó úwoi túwa'nai ena símai fasi'átínkáimba timíníye. Ímba Maníkó Mósesembo simámakain-amaambo ísaraawi aantembanifo Émbaramumo amankúnkúmba uráintemba timankúnkúmba owí wemá úwoi túwa'nai iye. Maníkón-aaisafeta

simankúkúmba úndawisa Émbaramu kentáá síwá'náraamban-iyé.

17 Maníkón-aúranka'a Émbaramu mérowana maarán-áái símai agaimaréna séna

fí'o-fi'on-kwaasi tíwá'náma

óne Maníkó siyáiyé

agaimaréna siyáiyé. Maníkó púwómpinkembo iyáfasintinkaiwai éna wemó aaimó sisanamó ímbo wérain-tantaakomo paápé iwáín-ááisafena Émbaramu amankúkúmba uráiyé.

18 Waási ímbo paápé íyan-tantaatafena Maníkó Émbaramuntafena súwana Émbaramu érai'a miyá ínena siyé siyáimba póna fí'o-fi'on-kwaasi tíwá'nán-iyé. Maníkón-aai aúfáifimba agaimaréna séna

enaísaafitantambo íyawí

sáwífa'-waasi paápé ónááwe

agaimaréna siyáinka'a pósa paápé uráawe.

19 Ááéma Émbaramu waurámbá kéné sáwífa'-aatai 100 aatai maisuwéna mérowana awaainínkó Séraa age-ínímbá mérowana póna ímba imáyáa éna Maníkóntáféna fasi'ámai imáyáa éna

20 Maníkó símaimo fasi'ámakon-aaisafena érai'e séna ímba kae'-ímáyáa éna fasi'ámai ména Maníkón-áwí'a mósá maréna

21 séna Maníkómó símaimo fasi'ámakainten-úmai kanaa'á iyámpói simíníye séna

22 miyáumai Maníkón-aaisafena érai'e séna amankúkúmba úntafena séna arupíse úmai méraane siyáiyé.

23 Arupíse úmai méraane siyáimba ímba Émbaramuntafena aantemba siyáifo

24 kentáásáfénawara'a miyán-áái siyáíye. Fasi'aénkó Ísumba pukáimpinkemba Maníkó íyáfasinankaraiwain-aaisafeta érai'e sэта simankúnkúmbo úndasafenasa séna arupíse úmai méraawe wésiye.

25 Kesáámó sáwí'o uráundasafenasa kentáási sáwí-meyambo maisiyuwáíndasafenasa Maníkó Ísu Káráísitimba ai'marówana kuména kumpuwúwana Maníkó wenaúranka'a arupíse uwásinkaindasafenasa pukáimpinkemba íyáfasinankaraiye.

5

Maníkó arupísesaamo uwásínkáín-aaí.

1 Ísu Káráísitin-aaisafeta simankúnkúmbo úndasafenasa Maníkó wenaúranka'a arupísesa uwásínkarenasa Fasi'aénkó Ísu Káráísitini kísau-ímayaa éna faru uwásínkáísata mimbórái'a úmaísa méraumne.

2 Ísu Káráísitin-aaisafeta simankúnkúmbo úndasafenasa Maníkó úwoi wésuwa'nai-ipata mósinkaraisata méta Maníkóe'a sámo kain-áémpátá méraandasafeta amu'maréta méraunanasá sirunkósá aamoí wéíye.

3 Umbai-tántáá'ó kempátáámó wéraimba sirunkósá aamoí isatá minúbái-tántáá'ó wéraintafeta fasi'ámai méta ímba suwesarái ínta

4 mindásafena Maníkó séna kawé'-úmai méraawe sisatá mindásafeta weséta méraandasafeta amu'maréta méraunana sirunkósá aamoí wéíye.

5 Weséta méraandasafeta amu'marétaamo méraundasa kentáásáféna ímba awínkáínda

póna ímba sigaesá íníye. Maníkó wení Ufaen-ámútánkómbá ai'marówana keséta kumbéna Maníkómó kentáásáfénamo óraa'-imayaamo ímbá aráásímímba póta wesé'o méraandasafeta amu'maréta méraunanasa póna ímba sigaesá wéíye.

⁶ Kesáá ímba fasi'ámai méraawananas Maníkómó siyáin-kanaamo tiyáimba kesáámó sáwí'o úmaisaaamo méraundafinkembo kusúwa'nai índasafenasa Ísu Káráisiti kumpukáíye.

⁷ Arupíse-waasigombo áwa'nai ondasáfé'a puwónaemo senkakaa umbaí taisinó. Kawe'-wáásígómbó áwa'nai ondasáfé'a wen-ánóndáa puwónae sésa púwówaisi ína púwówaisino ímba isáúmne.

⁸ Énifo kesáámó sáwítaamo úmaisaaamo méraundasa súwa'nai índasafenasa Ísu Káráisiti kumpukáíye. Ísu Káráisiti pukáimpinkemba Maníkó arumbó símínta mindása wéaraasimiye.

⁹ Ísu Káráisiti kentáá-ímáyáá énamo pukáintafena Maníkón-aúranka'a arupíse uwásínkarainta pónasa Káráisiti érai'a kentáási sáwí-meyamba maisíyukaintafenasa Maníkó ímba aaisambá síníye.

¹⁰ Kesáá Maníkómbó síyámba uwánkaraundasa wenááninko kentáá-ímáyáá éna pukáimba póta Maníkóe'a mimbórá-ímáyáárátá méraundasa miyáumai Ísu Káráisiti úwoi ména póna érai'a kawe'-ámpá'ó kúndasafenasa wégarawiyiye.

¹¹ Ímba mináái aantembanifo maarán-ááiwará'án-íye. Fasi'aénkó Ísu Káráisiti Maníkónté mimbóráí'a uwásínkáisanasa póna

Maníkóntáféna kesirunkósá aamoí wéiye.

Ándámunte Ísunte-taai.

¹² Maarán-áái ísáaro. Aifaráán-kwáásígó Maníkón-aai taráiyaimba póna sáwí'o on-ámbá paápé uráiyé. Sáwí'a uráimba póna púwón-amba paápé uráiyé. Seyaafá'nánká sáwí'a ombá pósa púwón-ampa'a wégowe.

¹³ Maníkómó Mósesembo áamáambo ímbo simámakonka'a waási sáwí'a uráimba isaná Maníkó misáwí'ó uráan-aai ímba agaimakáiyé.

¹⁴ Aifa'á Ándámu mérowasa matinka-matinka úmaesa tunka'á Mósesemo iyámaunka'-waasisomba pukáawe. Ándámu Maníkón-aai taráiyowasa wempákén-kwáásí tuwímbai ímba miyá umbá sáwí'a ésa pósa pukáawe.

Ándámu ánaaembo paápé índawimo índanteni'a éna Káráísitimo tuwímbai-tantaa'o índanteni'a ímba uráifo

¹⁵ sáwí'a uráimbanifo Maníkó úwoisa wésuwa'nai-iye. Ándámu Maníkón-aai taráiyaimba pósa seyaafá'nánká pu'maésamo iyómba érai'-aain-ifo Maníkó seyaafá'nánká úwoi túwa'nai índasafena moóráwigomba Ísu Káráísitimba ai'marówana kuména kawé'á uwátínkáfa'a iyimba minánkó iyáákaraiye.

¹⁶ Ándámu aifaráán-kwáásígó sáwí'o uráinkakemba seyaafá'nánkátá sáwí'a úmaeta iyúnanasa Maníkó ímba miyámó ímbá kawetá uwásínkáiyé. Aifa-kánáá aifaráán-kwáásígó Maníkón-aai taráiyowana Maníkó séna sáwí'a ónda po puwínone séna ánaaemba sáwífa'-waasi

sáwí'a uwaná séna úwoi túwa'nai e'a kesúranka'a arupíse uwátinkanaumne siyáíye.

17 Ándámu aifaráán-kwáásígó sáwí'o uráinkakemba seyaafá'nánká puwí-ámpá'á arááiwaéwana minánkó ta'ótokaifo moóráwigo Ísu Káráisiti maarán-óráá-káwé-kísáú maiyáíye. Maníkóntáfésa súwa'nai uwómó sewí úwoi kawé'-úmai túwa'nai ena wenaúranka'a arupíse uwátínkáísana Káráisiti túwa'nai isasá fasi'ámai mésa sáwí-kisaugomba wéiyaakaawe.

18 Énifo minááígóní áwáuma maarán-ááín-íye. Aifaráán-kwáásígó sáwí'o urónkakemba Maníkó seyaafá'nánkátáféna séna sáwí'a ésa puwónááwe siyáimba póna moóráwigo Ísu Káráisiti kawé'á urónkakemba sáwí'o uráampinkemba faútinkena aúí'o úmáimo maé'mae'o íyani'a wéuwatinkaiye.

19 Aifaráán-kwáásígó Maníkón-aai taráíyonkakemba seyaafá'nánká sáwí'a uráambanifo moóráwigo Ísu Káráisiti Maníkó siyáintemba urónkakemba Maníkó wenaúranka'a sáwífa'nanka arupíse wéuwatinkaiye.

20 Sáwí'o umbá Maníkó wení áamáamba Mósesemba simámakomba mindásafena miwítí sáwí-imayaago óraa'a uráíye. Miyá umbánifo Maníkó arumbá uwátínkámaena iyúwana óraa'a uráíye.

21 Ááéma sáwí'o urón-imayaago ta'ótokowasa pósa puwí-ámbá arááíwakaawe. Miyá uráambanifo káfé'a Maníkómó arumbó uwásínkáíwaisa ta'ótóráisata wenaúranka'a arupíse úmaisamo méraundasa kentáási

Fasi'aénkó Ísu Káráisiti aúítaamo úmaisa
maé'mae'o onda-íta wéuwasinkaiye.

6

Ísuwe'a kááísamaisaamo méraunda-aai.

¹ Simátíménda ísáaro. Maarán-áái ímba seró.
Maníkó úwoi súwa'nai úmae iyínana óraa'a
índasafeta sáwí'a úmae iyéta méranae ímba seró.

² Púwón-kwaasimo miwítí sáwí-imayaagomo
ímbo aneka'ó ta'ótotuwenamo wéraintemba
kentááfimbá sáwí-imayaago ímba ta'ótotuvena
wéraisata póta ímba sáwíta úmaeta iyéta
ménaumne.

³ Maarán-áái é'a ísaraawe. Nombó
maisínkáanta Ísu Káráisiti weséta
kááísasinkaisata weséta pukétaaraamba úmaisa
méraunanasa kentáásí sáwí-imayaago ímba
ta'óto'maena íyísata méraumne.

⁴ Nombó maisínkáanta kesáá Ísu
Káráisitiyeta puwúnasasa utarááwataaraa
únanasa kentáásí sáwí-imayaago ímba
ta'óto'maena wéiyiye. Maníkó ken-
táásifowa fí'onka'ma'mai-fasi'aentambo
pukáimpinkembo íyáfasinankaraintemba kentáá
íyáfasisinkenaaraamba uráisata aúí'a úmaisa
méraumne.

⁵ Ísu Káráisiti pukáimba wemó waásiti sáwí-
imayaagomba íyáákaraintemba weséta kááísamai
méraundasafenasa sáwí-imayaago kentáá
ímba ta'ótokaiye. Miyáumai Ísu Káráisitimo
pukáimpinkembo íyáfasinankaraintemba weséta
kááísamai méraundasafeta aúí'a úmaisa
méraumne.

6-7 Maarán-áái ísaraawe. Púwówanamo ímbá sáwí-imayaago ímba ta'ótotuwena wéraisana kentáásí sáwí-imayaagoni fasi'aémbá tai'áínana kesáámó sáwí'o úmae iyúndawisa ímba ta'óto'mae iyíndasafena Ísu Káráisiti aaraa-táiyá'á pukáísana kentáásí sáwí-imayaago kentáá ímba ta'ótokaiye.

8 Ísu Káráisitiye'a pukétaaraanta úmaisa méraundasa póta mináái érai'-aai isatá weséta méraumne.

9 Maarán-ááísá ísaraumne. Ísu Káráisiti pukáímpinkemba iyáfasinkaisana puwí-fásí'áénkó ímba ta'ótoraisana aneka'á ímba wépuwiye.

10 Aoisaambó ombó tai'áíndasafena mimbórá-kánáá pukáimba póna mindásafena ímba aneka'á puwéna iyáfasinena ména Maníkóntáféna imáyáa éna méraiye.

11 Miyáumai imáyáa é'a sé'a pukétaaraanta úmaisa méraunanasa sáwí'o úndawisa ímba ta'ótotuwena wéraisata méta Ísu Káráisitiye'a kááísamaisa méraundasa Maníkó aamoí ínkwae-i'a úmaisa méraumne.

12 Kentí sáwí-imayaasafe'a tirááísafe'a ofáínifo sáwí'o owí kembiwí ímba ta'ótoraino.

13 Kentúsane kentiyáánamaisane ímba ewé símai sáwí'a é'a pukékaan-úmai méraawanamo iyáfasintinkaisa'o méraawi Maníkómpá'á kentúwawaa'a amé'a wentáfé'a ewé é'a kentúsane kentiyáánamaisane wení kawe-kísáú aantemba máéro.

14 Maníkó Mósesembo simámakain-amaanko ímba káráwiyisana Maníkó úwoimo túwa'nai iwái káráwiyisana póna kentí

sáwí-imayaago kentúma ímba ta'ótoraino.

Maníkó wení kísau-waasi-i'o uwátínkáín-aai.

15 Mináái imáyáa é'a simátíménda isáaro. Maníkó Mósesembo simámakain-amaanko kentáará'á ímba káráwiyisana Maníkó úwoimo súwa'nai iwáísá káráwiyisata mindásafeta ímba úwoi sáwí'a úmaeta íyóno.

16 Wení kísau maénaumnemo sembá wemá káráwiyisasa wení kísau-waasi méraawe-aai isaraawe. Miyáumai sáwí'o íyanamo éna misáwí-ímáyáágó ta'ótokaina'a misáwí-kísáú maimaé iyé'a méraawini áwáuma Maníkóní némpa'a maé'mae'a ónááfo Maníkón-aaimo isáíyanamo éna wemá káráwiyaina'a wení kísau maimaé'a iyíyana wenaúranka'a arupíse uwátinkainiye.

17 Ááémo sáwí'o uráawi ta'ótokowasa ánaaemba érai'-aai simátíma'maesa íyówa'a isé'a kentirumpimbá fasi'ámai ta'ótokaawa'a mindásafe'a Maníkómpá'á súwi sune.

18 Sáwí'o uwái ta'ótokompinkemba Maníkó faútinkowa'a arupíse-imayaa uwaná minárúpísé-ímáyáágó ta'ótokaiye.

19 Ímba fasi'ámai méraantafe'a kesáái isáíyan-aai simátimune. Ááéma sáwí'a ónae sé'a fí'o-fi'on-tantaa'wara'a sáwí'a uwaná ta'ótokaimbánifo káfé'a kawé'á ónae sé'a kawé-ímáyáá aantemba é'a Maníkóndé-i'a oro.

20 Ááémo sáwí'o uwái ta'ótokonka'a kawé'-ímáyáá ímbo umbá

21 sáwí'o uráamba káfé'a tigaemá wéiye. Sáwí'o untáféna ímba kawé-tántáá'á kentópa'a tiyáíye. Miyá-sáwí'ó úmae íyómpinkemba méraawini áwáuma Maníkóní némpa'a maé'mae'a wéowe.

²² Maníkó sáwí'o umpínkémbá faútinkena wení kísau-waasi-i'a uwátínkaraimba pó'a Maníkóndé-i'a úmai mé'a aúí'a úmai maé'mae'a ónááwe.

²³ Sáwí'o owí-ánóndáá puwíyambanifo Maníkó kentáásí Fasi'aénkó Ísu Káráísitini kísau-imayaa éna aúítaamo úmaisaamo maé'mae'o onda-íta wéuwasinkaiye.

7

Maníkóní ámútanko aráásímakain-antaamo arááiwaunda-aai.

¹ Kesí waásisono. Seyaafá'nánká áamáan-aai ísaraafo simátíménda ísáaro. Úwoimo méraanka'a áamáan-aai go káráwiyaimba póna puwíyamba minááígó ímba káráwiyiye.

² Áamáánkomo siyáintemba aarakwá'ó ombá awaaikómó aúmó aráínka'a awaaínkó wesé'a kááísamai méraisana awaaikómó púwisanamo ímba kááísamaimo méreyamba wétai'aiye.

³ Awaaiikómó méraínka'o aaregómó fí'on-kwaasigonka'o wimbá mindá sáwí-inimban-iye sefó awaaikómó puwínanamo éna áamáánkomo sintembá fí'on-kwaasimo maíndamo éna kanaán-iye.

⁴ Kesí waásisono. Miyáumai kentáfénawe séna

Ísu Káráísiti pukáimba Maníkómó Mósesembo simámakain-amaamba imáyáa é'a Ísu Káráísitiye'a kááísamaimo méraantafe'a pukékaambo úmaimo méraamba minámáánkó ímba ta'ótokaifo Ísu Káráísitiye'a kááísamai méraawe. Maníkó Ísu Káráísitimba

pukáímpinkemba íyáfasinankaraiwai Ísunde-i'a uré'a pó'a Maníkóní kísau wémaewe.

⁵ Ááéma sáwí-imayaasafeta sirááísafetaamo uráundarata ímba miyán-oro siyáin-amaamba iséta imáyáa éta ifátuweta sáwí-imayaasafeta sirááísafeta éta sáwí'a

éta púwónda-amba arááiwaeta

⁶ miyásáámó uráunda káfé'a Maníkó sáwí-imayaago ta'ótokaímpinkenta faúsínkáisanasa Maníkómó Mósesembo simámakain-amaanko ímba ta'ótokaisata ááéraan-amba Mósesemo agaimakáin-amaankoni aambá ímba arááiwaeta

aú-amba Maníkóní ámútanko aráásímakain-anta wéaraaiwaumne.

Maníkóní áamáambo ímbo wérainkakaa sáwí-imayaagoni áwáuma ímba isáúsino siyáin-aaí.

⁷ Minááímó imáyáamo é'a simátíménda ísáaro. Maníkómó Mósesembo simámakain-amaantafe'a sáwí-amaamban-íye ímba seró. Minámáán-ááímó ímbo wérainkakaa sáwí-imayaagoni áwáuma ímba isáúsino. Túraníyamba ímba oro. Minámáánkómó ímbo miyámó siyáinkakaa súraníyambo úndasafe'a sáwí'a úne ímba súsino.

⁸ Minámáánkó séna túraníyamba ímba orómó siyáimba kempímbá sáwí-imayaa wéraimba pó'a minámáámbá taraisónae sé'a súraníyamba áfááraumai uráumne. Minámáánkómó ímbo wérainkakaa sáwí'o únda ímba imáyáa é'a sáwí'a úne súsino.

⁹ Ámáánko ímba miyán-oro siyáimba ímba isé'a kawé'-úmai méraumne-imayaa é'a mé'a ánaaemba minámáámbá ísaraunda taraisónae sé'a taráíyaunda

10 mindá púwóndawi úne. Minamáámbó arááiwakaundarakaa kawel'-úmai mérausino. Minamáámbó taráíyaundawi pó'a púwóndawi úne-aai ísaraumne.

11 Minamáánkó séna ímba miyán-oromo siyáimba kempímbá sáwí-imayaago wéna póna karo'á simásínkáísa'a mináái taraisónae sé'a taráíyaunda pó'a púwóndawi úne.

12 Miyáumai Maníkómó Mósesembo simámakain-amaan-aai ímba miyá oró-áái Maníkón-aai arupíse-aai kawel'-ááin-iyé.

13 Minkáwél'-ááígó ímba púwónda-i'a uwásínkaraifo kesí sáwí-imayaago aantemba púwónda-i'a uwásínkariye. Sáwí-imayaasafe'a siráái wétaifo minamáámbó taraisónae sé'o taráíyaunda púwóndawi é'a kesí sáwí-imayaagoni áwáuma áfááraumai sáwí'a úwa'a awánaraumne. Minamáánkó séna ímba sáwí'an-oro siyáifo kemó sáwí'o uráunda kesí sáwí-imayaago aantemba óraa-sawí'a úwa'a awánaraumne.

Sáwí'o úndawisaamo ta'ótokain-aai.

14 Ámáámba Maníkómpákémbá kunkáifo kemá marapákén-kwáásí únana sáwí'o úndawi ta'ótokaisa'a minímáyáágóní kísau wémaumne.

15 Kawe'ó úndasafena siráái taisa'á miyá ónae súndanifo ímba miyá wéune. Sáwí'o úndasafena ímba siráái taisa'á ímba miyá ónae súndanifo miyá wéune. Miyámó únda ímba kawel'-ímáyáá wéune.

16 Ímba sáwí'a ónae súndanifo miyá-sáwí'ó úndasafe'a sé'a Maníkó siyáin-amaamba kawel'-ámáámbán-iyé sune.

¹⁷ Sáwí'lo únda ímba kemá miyá úmpo sáwí-imayaago kempímbá wéraisal'a sáwí'a wéune.

¹⁸ Marapákén-kwáásí únda kanaa'ó kawel'ó únda kempímbá ímba wéraisal'a awánaraumne. Kawel'ó úndasafena siráái taisa'á ímba kanaa'á kawel'á wéune.

¹⁹ Kawel'á ónae sé'a úndanifo ímba miyá é'a ímba sáwí'a ónae sé'a úndanifo úwoi sáwí'a wéune.

²⁰ Ímba sáwí'a ónae súndanifo miyá-sáwí'ó únda ímba kemá miyá úmpo sáwí-imayaago kempímbá wéraisal'a sáwí'a wéune.

²¹ Áwáuma maarán-iyé. Kawel'á ónae sé'lo úndanifo sáwí-imayaago tafisímaena íyísa'a

²² kesirumpimbá Maníkóní áamántafe'a aamoí úndanifo

²³ moórá-awauma kempímbá wéraisana sáwí'lo ónae súndawi kembá tafisisaná Maníkóní áamámba kawel'-ámámbá pó'a arááíwaenae súndawi tafisisaná sáwí'lo ónaemo súndawi tafisímai ta'ótokaiye.

²⁴ Sésé'á únana sirunkó sáwí'a isa'á méraundasafe'a sé'a sáwí'a é'a púwóraantambo úndafinkemba nááwa siyáíniyo súnana

²⁵ Fasi'aénkó Ísu Káráísiti síyáísa'a Maníkóntáfé'a súwi sune.

Miyáumai kesirumpin-ímáyáá é'a sé'a Maníkóní áamámba arááíwaenae súndanifo kesúgoma sáwí-imayaafinkemba sáwí'a wéiye.

Maníkóní ámútankomba arááímo tainí'o on-áái.

¹ Miyáumai Ísu Káráisitiye'o kááísamaimo méraawi miwítí sáwí-meyamba maitiyukaintafena Maníkó ímba aaifimbá maitinkéna sáwí-meyamba ímba timíníye.

² Ááéma sáwítaamo uráundawj ta'ótokowata púwóndasafeta ówánanasa Ísu Káráisiti faúsínkaraisata weséta aúí'a úmaisa méraunanasa Maníkóní ámútanko káráwiisana Maníkó aaifimbá ímba maisinkénasa ímba sáwí-meyanta simíníye.

³ Maníkó wení áamáamba siyáimbanifo sáwí'a ónae séta minámáámbá ímba kanaatá arááiwwakaunda póna minámáánkó sáwíta úmaisa méraundafinkemba ímba síkaisata méraunanasa ánaqemba Maníkó wenááninkontafena séna sáwí'a ombá po miwísáféwe sé kumpuwínone séna ai'marówana kesáámó sáwí'o úndawisaamo úndanten-auwarawi maimaéna kentáásí sáwí-imayaamo maisiyuwáíndasafenasa kumpukáíye.

⁴ Maníkó miyá uráimba póta sáwí-imayaasafetaamo sirááísafetaamo úndasa ímbo miyá étaamo Maníkóní ámútankomo siyáintembo étaamo éta Maníkóní áamáánko siyáintemba miyásá úmaisa arupísesa ónaumne.

⁵ Sáwí-imayaasafesamo tirááísafesamo owí miwítí sáwí-imayaago ta'ótokaifo Maníkóní ámútankombo arááímo táínda-i'o owí wení kawel'-ímáyáágó wégarawiyiye.

⁶ Miwítí sáwí-imayaasafesamo tirááímo tain-ímáyáá aantembo owí méraawini áwáuma Maníkóní némpa'a maé'mae'a ónááfo Maníkóní ámútankombo arááímo tain-ímáyáá aantembo

owí aáno úmai aúí'a úmai maé'mae'a ónááwe.

⁷ Sáwí-imayaasafesa tirááísafesa on-ímáyáá aantembo owí Maníkóní áamáamba ímba kanaa'a taawiyafesa Maníkóní namuro-wáásíyáámbán-owe.

⁸ Sáwí-imayaasafesamo tirááímo táinda-i'o íyawí Maníkó ímba aamoí wéuwatinkaiye.

⁹ Maníkóní ámútankomo kentirumpimbó méraimbo é'a sáwí-imayaasafe'o tirááímo táinda-i'a ímba é'a Maníkóní ámútankomo siyáintemba é'a méraawe. Ísu Káráísitini ámútanko tirumpimbó ímbo méraiwei ímba wení waásin-owe.

¹⁰ Ísu Káráísitini ámútanko kentirumpimbó méraimbo éna Maníkó wenaúranka'a arupíse uwátínkaraimba pó'a kentí ámútanko maé'mae'a índawi é'a sáwí'o uráantafe'a kentúgoma puwíndawin-owe.

¹¹ Maníkó Ísumba pukáimpinkemba íyáfasinankowana wení ámútankomo kentirumpimbó méraimbo éna kenkwará'ó éna puwíyampinkemba íyáfasintinkainiye. Wení ámútanko kentirumpimbá méraintafena Maníkó miyá íníye.

¹² Kesí waásisono. Mináái imáyáa íyata ímba kentáásí imáyáafinkeni'a éta Maníkóní ámútankombo arááímo táinda-ita úmaisa méraano.

¹³ Sáwí-imayaasafe'o tirááísafe'o ombó éna Maníkó séna méraawini áwáuma Maníkóní némpa'a méraaro siyáifo Maníkóní ámútankomo

túwa'nai ína'o sáwí-imayaamo tuwé'o é'a aúí'a úmai ménaawe.

¹⁴ Maníkóní ámútankomo sintembó owí Maníkón-áánintomban-owe.

¹⁵ Maníkó wení ámútankomba ai'marówana kentirumpimbá méraiwai ímba inkáítinkaisana inkaisí-ímáyáágó ímba ta'ótokaisa'a méraafo Maníkó wenáánintoni'a uwátínkáísa'a Maníkómbá áante'a sé'a kesifóo sé'a méraawe.

¹⁶ Kesáá séta Maníkón-áánintonta únesaamo súnda Maníkóní Ufaen-ámútánkó kentáásirumpimba ména séna mindá érai'-aain-iye wésiye.

¹⁷ Maníkón-aráá'a úndasa póta Maníkómó kentáásáfénawe sénamo to'mayaa úmakaimba maimaéta Ísu Káráisitimo maíndanten-úmaisa maénaumne. Umbai-tántáákómó wembó uráintemba kentááfimbá umbai-tántáá'a wéraimba póta ánaaemba weséta sámó kain-áémpátá ménaumne.

Maníkó wení fí'onka'ma'mai-sasaamo aráásiminda-aai.

¹⁸ Maarán-áái imáyáa é'a sé'a érai'a Maníkó wení fí'onka'ma'mai-sama aráásiminata mindásafeta imáyáa éta kentááfímbó wérain-umbai-tantaatafeta ímba óraa'-imayaasa wéune.

¹⁹ Maníkón-áánintone ayáámúntonesa únasasa Maníkómó úmakain-tantaako waí-waankowe taaigówé seyaafá-karáán-tántáákówé kentáámó suwánáiyantafesa mósá titaawiyésa simu'marésasa méraawe.

²⁰ Naaófá'a Maníkó uwámakain-tantaatafena séna kawáá'a uwáwíníye wení imáyáafinkemba

séna ímba miwítí imáyáafinkemba siyáimba
maarán-ímáyáá éna séna

21 ánaaemba kawáá'índa-tantaa'a aambá
fáitinkaanana uwámakaunda-tantaa'a aneka'á
ímba kawáá'a íníye. Kesí iyámpóimo
faútínkáanasamo kawé'ó úmaimo méraiyantemba
mintántáákó miyáumai kawé'-úmai wéíniye
Maníkó minímáyáá uráiyé.

22 Maarán-ááísá ísaraumne. Aaremó
iyámpóimo matinkánaesamo sésé'ó ontembá
Maníkómó seyaafá-tántáá'ó úmakain-tantaako
sésé'á éna Maníkómó úmakain-tantaa'a paápé
ínana awánánae séna amu'maréna méraiye.

23 Ímba Maníkómó úmakain-tantaako
aantembanifo kesááwará'á miyásá éta Maníkómó
to'mayaa úmakain-tantaa'o simíndasafeta
imáyáa ondasáfénasa Maníkó wení ámútankomba
ai'marówana kesirumpintá kumbéraisata
sésétá éta amu'maréta méraunanasa Maníkó
wenayáámúntone wenáánintone síkenasa aú-
suwawaa'a uwásinkaindasafeta amu'maréta
méraumne.

24 Maníkó kawé'-ámpá'ó mésinkonkata séta
érai'a Maníkóní iyámpóíya éta weséta méraumne
séta amu'maréta méraumne. Awánasuwaunda-
tantaatafeta ínta amu'maréta ímbo awánáúnda-
tantaatafeta amu'maréta ménaumpo

25 ímbo awánáúnda-tantaatafeta amu'maréta
méta séta érai'a paápé íníye séta ímba suwesarái
ínata fasi'ámai amu'maréta ménaumne.

26 Ímba fasi'ámai-waasi méta kawé'-ámpátá
kúnanasa umbai-tántáákó ta'ótóráísana
póna Maníkóní ámútanko súwa'nai isatá

nóraumaisaawa Maníkómbá áísai onanasááwá súwa'nai íníyo séta sirumpintá sésé'-aantemba éta ímba kanaa'á aái súnanasa Maníkóní ámútanko kentáásáféna imáyáa éna Maníkómpá'á áísai isaná

²⁷ Maníkóní ámútanko Maníkómbó arááímo tain-áái séna wení waási-imayaa éna miyán-áái simbá póna Maníkó kentáásí imáyáa awánaiwai póna wení ámútankomo sin-áái wéisaiye.

²⁸ Maarán-áái isáúmne. Wení waási-i'a on-dasáfénasa wemparí'a úmakaisata wen-imáyáa éta méraunanasa sáwí-tantaa'e kawé-tántáá'é kempátáámó timbá Maníkó mintántáá'á kawé'á wéuwasinkaiye.

²⁹ Naaófá'á Maníkó wendé-í'a úmai wemparí'a úmakowaisafena séna kesááninkaamba ónááwe siyáimba póna wenááninko Ísu kentáásuwaao-i'a isatá wenáúnafaraawinta úne.

³⁰ Naaófá'á wemparí'a úmakowisafenasa saántenasa wenaúranka'a arupíse uwásinkenasa wenááninkaani'a wéuwasinkaiye.

*Maníkó arumbá siménasa Ísumba
ai'marówanamo kumpukáin-ai.*

³¹ Maníkó miyáumai súwa'nai uráifo imáyáa é'a simátíménda ísáaro. Sáwí'a uwátinkanæ sésamo miyámó iyamba ímba kanaa'á kentáa iyáákanaawe.

³² Maníkó wenááninkomba ímba ta'ótorena kentáásí sáwí-imayaa maisiyuwáínkwæ sénasa ai'marówana kumpukáíye. Miyá uráifo súwa'nai índa-tantaa'a úwoisa simíníye.

³³ Maníkó kentáá wemparí'a úmakaiwaisa wenaúranka'a arupísesa uwásínkarainta pósa tuwímbai-waasi ímba kanaa'á aaifintá maisinkánááwe.

³⁴ Tuwímbai-waasi kentáásáfésa puwíwae sésa ímba aaifimbá maisinkánááwe. Ísu Káráisiti kentáásáfénasaawe séna puwéna iyáfasinena Maníkón-ayáánúrapa'a fasi'aén-áémpá'á ména kentáá súwa'nai ena Maníkómpá'á inaí wésiye.

³⁵ Miyá intáfésa tuwímbai-waasi ímba kanaa'á Káráisitiyetaamo méraundafakenta síyááwanasa Káráisiti kentáásáfénasa ímba awinkéna kentáá-ímáyáá ímba wétuwaiye. Umbai-tántáá'ó kempátáámó tındawe aoisaambó wisínkétaawe sáwí'ó uwásínkéntaawe sááimo táíndasaawe unáánkwátói-iyaintaamo ondasááwé tuwímbaimo sínkamiyantaawe púwóndasaawe miyán-tántáá'ó kempátáámó tında Káráisitiyetaamo méraundafakenta ímba kanaatá síyááwanasa Káráisiti kentáásáfénasa ímba awinkéna kentáá-ímáyáá ímba wétuwaiye.

³⁶ Naaófá'á Maníkón-aai aúfáífimba agaimaréna séna

ení waási-ita úndarakemba tuwímbai-waasi kentáásáfésa sésa tínkamónasa puwíwae-imayaa úmaesa wéiyowe. Sipisípimo tufúwówanamo púwíntemba kentáásáfésa tínkamónasa

puwíwae símae iyówe

agaimaréna siyáíye.

³⁷ Miyá-sáwí'ó uwásínkáanta ímba imáyáá únanasa Ísu Káráisiti arumbá símímba póna fasi'ásínkáísata miwísá wéiyaakaumne.

38-39 Maarán-áái érai'-aai isa'á ísaraumne. Maníkó arumbá siménasa Fasi'aénkó Ísu Káráísitimba ai'marówana kentáásáfénawe séna kumpukáimba pósa Maníkómpá'ó méraundafakenta ímba kanaatá siyánááwe. Púwóndasaawe úwoimo méraundasaawe Maníkómpá'ó méraundafakenta ímba kanaatá siyánááwe. Wiyómpaken-kisau-waasiye sáwí-amutane ífé'o wérain-tantaa'e ánaaembo paápé índa-tantaa'e wiyómpakewiye waántá-waasiti marupákéwiyé Maníkómó úmakain-tantaa'e miyán-tántáátónkó ímba kanaatá Maníkómpá'ó méraundafakenta síyááwanasa Maníkó kentáásáfénasa ímba awinkéna kentáá-ímáyáa ímba wétuwaiye.

9

Póro Ísareri-waasi arumbó uwátínkarain-aai.

¹ Kemá Póro Ísu Káráísitini waási é'a érai'-aai aantemba súnana Maníkóni Ufaen-ámútánkó ke-sirumpimbá ména káráwiyisa'a maarán-áái érai'-aai wésimatimune.

² Kesí waási Ísareri-waasifinkembo kemá tiyáunda isa'á imáyáa únana sirumbá isaná sirunkó umbaí támae íyíye.

³ Miwí Ísu Káráísitin-aaisafesa ímba érai'e sembá pósa érai'emo sésamo ken-ánóndáámó iyámaiyanamo Maníkómó siyuwáinanamo Ísu Káráísitimo ánaaembo uwásiyuwainda mindá kanaán-iye sune.

⁴ Miwí kesí waási Ísarerin-andafakewi Maníkó wenáánintoni'a úmai wemparí'a úmakena wení sámá aráátimena aaimá símai kááísatinkena wení amáamba simátimena símai fasi'ámakain-aai

simátimena Maníkón-ímáyáámó mósá máraán-
amba aráátimuwasa

⁵ ááéraan-oraa'-waasi miwí tíwá'náma uwaná
Ísu Káráisiti iyámpói ú'mai minándáfá'á kumbéna
seyaafá'-wáásíyá'á káráwiyisata wenáwíta mósá
ma'maéta iyúnda mindá érai'-aain-iyé.

⁶ Maníkó Ísarerin-andafaken-kwaasifinkemba
ímba seyaafá'á wemparí'a úmakaifo tuwímbai
wemparí'a úmakaimba Maníkó fasi'ámakain-aai
taráíyaiyé ímba sénáísaiyé.

⁷ Émbaramun-aísaafitantambo uráawi ímba
seyaafá'án-ofo tuwímbai Maníkóni iyámpói
owaná naaófá'á Maníkó Émbaramun-afena séna
enááninkon-awí'a Áísáaki wenaísaafitantambo
íyawi aantentafena séna enaísaafitantamba
wéowe sénááwe Maníkó siyáiyé.

⁸ Minááígóni áwáuma maarán-iyé. Émbaramun-
aísaafitantambo uráawifinkemba ímba seyaafá'án-
ofó Maníkó kesí waásin-owemo óraaka'o siyáiwai
aantemba Maníkóni waásin-owe.

⁹ Naaófá'á Maníkó Émbaramun-afena símai
fasi'ámakain-aai séna súnda-kanáa tína'a
méraanana Séraa waaíyámpói ma'ankáiniyé
siyómba

¹⁰ mináái kentáá síwá'náma Áísáakintafena
siyáiyé. Wemá óraa'a éna aaré maiyówana
awaainínkón-áwí'a Répéka amáántágae'-iyampoi

¹¹ ímba matínkaroyasarai miníyámpói'yái ímba
kísau maiyóyanka'a

¹² Maníkó minínínkóntáféna séna ení
iyámpói'yaimo ésarai aifarááwí ánaaenkewini
kísau máiniyé siyáiyé. Maníkó wení

imáyáafinkemba wení waási-i'a úmai wemparí'a úmarena táántaraifo miwítí kísau ímba awánarena táántaraiye. Miyáumai naaófá'á séna ení iyámpóiyaimo ésarai aifarááwí ánaaenkewini kísau máíníye siyáíye.

¹³ Maníkón-aai aúfáífimba miníyámpóiyáisáféna agaimaréna séna

Yékopumba kemparí'a úmare'a Ísomba sínaaeni'a úmaraune Maníkó siyáíye agaimaréna siyáíye.

¹⁴ Tuwímbai mindásafesa imáyáa ésa karo'á sésa Maníkó ímba arupíse iyémó sembá mindá karo'-ááín-íye.

¹⁵ Naaófá'á Maníkó Mósesentafena séna sirumbó uwátinkanae súndawisafe'a sirumbá uwátinkaumne. Kawe'ó uwátinkanae súndawisafe'a miyá wéune siyáíye.

¹⁶ Miyáumai ímba waási tirááímo taintáfénawe waási kawe-kísáúmó maíyantafenawenifo Maníkó wení imáyáafinkemba séna sirumbá uwátinkanae siyáintafena wení waási-i'a úmakaiye.

¹⁷ Maníkón-aai aúfáífimba agaimaréna séna Mósesé méronka'a Ísípi-marafa'o káráwiyowi wentáféna Maníkó séna seyaafá'-márafákén-kwáásí kesí fasi'aéntámbó enane'ó úndama awánésa kesúwí'a isáíwae sé'a embá káráwiyi-kisaura'a íyáfasinankaraumne Maníkó siyáíye agaimaréna siyáíye.

¹⁸ Miyáumai Maníkó wení imáyáafinkemba wembó arááímo tainí'o énamo sirumbá

uwátinkanaemo simbá arumbá uwátinkena
wembó arááimo tainí'o énamo tirumbó
máraántembo imbá tirumbá máraántemba
wéuwatinkaiye.

*Maníkó aaisambá tiyéna arumbá
uwátinkenamo in-áái.*

¹⁹ Mindásafe'a imáyáa é'a maarán-áái ímba
seró. Sáwítaamo úndasa nóra sénawa Maníkó
aaifintá maisinkáíyo. Maníkó imáyáa éna séna
sáwí'a ónááwemo siyáimba mindása sáwíta
wéune. Miyáumai aaifimbó maisinkáínta mindá
sáwí'an-iye mináái ímba seró.

²⁰ Kembiwí úwoi-waasi méraafo Maníkómó
siyáin-aaí anondáa ímba seró. Maarán-áái
imáyáan-oro. Sawe-ánáfeumbo ombá agari'-
márámá maiyésa sawe-ánáfeumba úmáraáwana
misáwé-ánáfeunko ímba maarán-áái wésiye.
Nóra séra kembá miyá uwásinkaaó ímba wésiye.

²¹ Sawe-ánáfeumbo ombá mimbórá-ágáí'-
márámá maiyésa kae'-ánáfeumba úmaresa
moóráfimba úwoi-kisau maésa moóráfimba kawe-
kísáúmó máémba mindá miwínén-iye.

²² Maníkó miyaráámbá wéiye. Maníkóní
fasi'aéné aaisambó siné awánáiyantafena sáwí'o
uráan-kwaasimo tínkaminda miwítí méyámbá
póna ááéma ímbo tínkamimba timu'maréna ména
ánaaemba tínkaminiye.

²³ Kentáa wemparí'a úmarenasa arumbá
uwásínkáínta póta weséta sámó kaipatá méta
wení fí'oran-kawe-kisau awánaandasafenasa
Maníkó sáwí'o uráan-kwaasi ímba ááéma
tínkamimba timu'maréna méraiye.

24 Ímba Yúndaa-waasifinken-aantenta
sáántaraifo fi'onkaa-waasiwara'a táántaraiye.

25 Miyáumai naaófá'ó Maníkón-aaimo
simátímakowin-awi'a Ósíya agaimaréna séna
Maníkó séna ímba kesí waási-i'a uráan-
kwaasisafe'a kesí waásin-owe sé'a ímbo
sirumbó tímakaundasafe'a sirumbá tímúne
sénaumne.

26 Ímba kesí waásin-owe siyáundafa'o
méraawisafe'a ánaaemba kesáánintomban-owe
sénaumne Maníkó fasi'aénkwáráwí síníye

Ósíya agaimaréna siyáíye.

27 Naaófá'ó Maníkón-aaimo simátímakowin-
awi'a Áísáya agaimaréna séna

Ísarerin-andafaken-kwaasi sáwífa'a ésa
nonáamááíyaamba úmai sáwífa'-waasi
ménaafo Maníkó ímba seyaafá'á tiyáínifo
tuwímbai sáwí'o úmimo méraampinkemba
tiyáíníye.

28 Fasi'aénkó seyaafá'nánká minúwóiyáán-úmai
aaifimbá maitinkéna sáwí-meyamba tímíníye
agaimaréna siyáíye.

29 Moóráfa'a Áísáya agaimaréna séna
Fasi'aénkó seyaafá-fásí'áémbó tokáiwaimo
sénamo tuwímbai ímba tínkamonda
tiyúwáanasa mésa iyámpói matinkánááwe
siyáinkakaa Sónómu-naopaken-
kwaasiye Kómóraa-naopaken-kwaasiyemo
putásaraantemba kesááwárá'á miyásá
úsino
agaimaréna siyáíye.

*Ísareri-waasi Ísun-aaisafesa ímba
timankúnkúmbo uráan-aai.*

³⁰ Minááígóní áwáuma maarán-iyé. Fí'onkaa-waasi Maníkón-aúranka'a arupíse úmaimo méraan-ambo ímbo saafá uráawi Ísu Káráísitin-aai isésa timankúnkúmba ombá póna Maníkó wenaúranka'a arupíse uwátínkaraiye.

³¹ Miwí miyá uráafo Yúndaa-waasi Maníkó wemparí'o úmakaiwai sésa Maníkó Mósesembo simámakain-amaamba arááíwáénanasa wenaúranka'a arupísesa uwásinkainiye siyáafo Maníkó Mósesembo simámakain-amaankoni áwáuma ímba isésa wenaúranka'a ímba arupíse úmai méraawe.

³²⁻³³ Maníkóní áamáamba arááíwáénanasa wenaúranka'a arupísesa uwásinkainiye siyáafo wenááisafesa ímba timankúnkúmba uráantafena ímba arupíse uwátínkaraiye Maníkón-aai aúfáíimba Ísuntafena

símai agaimaréna séna

Maníkó séna isáaro. Sáiyóni-naopa'a moórá-ontamba maráúnda pósa minóntánká'á tísamaima turarésa tanaambá fánááwe. Ótantafenamo siyáintembo índawimpa'o timankúnkúmba íyawi ímba tigesáfésa

ónááwe siyáíye

mináái agaimaréna siyáíye. Óntanemo siyáimba Ísuntafena siyáíye. Óntanka'o tanaambó faantembá Ísu Káráísitin-aaimo taraisésa miyáumai tanaankáámbá fánááwe.

10

¹ Maanááímó simátíménda isáaro. Kesí waási Yúndaa-waasi sáwí'o úmaimo méraampinkemba Maníkó faútinkaindasafena áfááraumai sirááíma wétaisa'a Maníkómpá'á inái símae'a iyúne.

² Yúndaa-waasi Maníkóní kísau maénae sésa fasi'aambánifo Maníkón-aaigoni áwáuma ímba ísraamba tuwánaraumne.

³ Maníkómó wenaúranka'o arupísemo uwátínkáín-amba ímba awánésa karo'-ántáfésa érai'-amban-iye sésa pósa Maníkóní érai'-amba ímba wéaraaiwaewe.

⁴ Ámáámba arááiwaundasafena Maníkó wenaúranka'a arupíse uwásinkainiye sésa Yúndaa-waasi arááiwaén-amba Ísu Káráisiti séna minámbá tai'áifo kesááisafesa timankúnkúmba owísáféna Maníkó wenaúranka'a arupíse uwátínkáímbanifo Yúndaa-waasi minámbá ímba wéaraaiwaewe.

⁵ Maníkó Mósesembo simámakain-amaamba arááiwaénanasa Maníkó arupísesa uwásinkainiye sen-ááisáféna naaófá'á Mósesese agaimaréna séna minamáámbó seyaafá'ó arááiwaiyawí kawe'-úmai ménaawe siyáíye.

⁶ Maníkón-aaísafesa timankúnkúmbó owímó arupíse uwátínkáín-aaísafena agaimaréna séna maarán-áái ímba seró. Nááwa wíyómpa'a iyénawa Káráisitimba áí'maenawa kumíníyo.

⁷ Nááwa pukáan-kwaasimo méraapa'a kuréwa Káráisitimba áí'maenawa tíníyo. Miyán-áái ímba seró.

⁸ Maníkón-aaí kentirumpimbá ewaa'á wéraisaa'á wésewe agaimaréna siyáíye. Ísu Káráisitin-aaísafe'a timankúnkúmba oró-áái simátimunda

⁹ mináái maarán-iye. Ísu kentáásí Fasi'aénkón-iye afora'ó simátíme'o kentirumpinkémbó sé'o

Ísu pukáimpinkemba Maníkó íyáfasinankaraiyemo
síyanamo éna sáwí'o úmaimo méraampinkemba
Maníkó faútinkainiye.

10 Maníkón-aaisafeta kesirumpintá
simankúnkúnta úndasa wenaúranka'a arupísesa
uwásínkáísata afora'ó minááímó simátimundasa
sáwí'o úmaisaamo méraundafinkenta
wéfausinkaiye.

11 Maníkón-aai aúfáífimba agaimaréna séna
siyáintembo índawimpa'o timankúnkúmbo
íyawi ímba tigaesáfésa ónááwe siyáiyé.

12 Mináái seyaafá'-wáásí Yúndaa-waasiye
fí'onkaa-waasiye Maníkón-aúranka'a
mimbórái'a ontáféna siyáiyé. Maníkó
seyaafá'nánká'ó káráwiyaiwai éna súwa'nai
ínkwae sésamo simámén-kwaasi óraa-kawe'a
wéuwatinkaiye.

13 Maníkón-aai aúfáífimba agaimaréna séna
Fasi'aénkóntáfésa sésa sáwí'o úmaimo
méraundafinkemba siyáínonemo sewí
seyaafá'nánká miyá íníye
agaimaréna siyáiyé.

14 Maníkó ímba méraiye-aaimo sewímó ombá
súwa'nai uwo ímba kanaa'á wésewe. Maníkón-
aaimo ímbo ísááwimo ombá minááísáfésa
timankúnkúmbo ímba kanaa'á wéowe. Maníkón-
aaimo ímbo kosimátíméwasamo ombá mináái
ímba kanaa'á ísááwe.

15 Ímbo ti'marááwasamo ombá ímba kanaa'á
kowásimatimewe. Maníkón-aai aúfáífimba
agaimaréna séna
ásé-aaimo kosimátíméwi
aamoí wéuwatinkaawe
agaimaréna siyáiyé.

16 Minásé-áái isésamanifo tuwímbai taráíyaawe. Mindásafena naaófá'á Maníkón-aai simátímakowin-awi'a Áísáya agaimaréna séna Fasi'aénkóo kawé'-áái kosimátimunasasa minááísáfésa ímba timankúnkúmba owe agaimaréna siyáíye.

17 Ísu Káráísitin-aaimo simátíméwasamo isésamo ombá kanaa'á timankúnkúmba wéowe.

18 Yúndaa-waasi Ísu Káráísitin-aai érai'a é'a ísaraawe sune. Mindásafena naaófá'á Maníkón-aai aúfáífimba agaimaréna séna seyaafá'-márafá'á wénesa simátímúwana minááígó wété uráíye agaimaréna siyáíye.

19 Yúndaa-waasi mindá Ísareri-waasi minááígóní áwáuma é'a ísaraamba mindá érai'-aain-íye. Naaófá'á Mósesé Maníkómó siyáin-aai agaimaréna séna Yúndaa-waasi fí'onkaa-waasisafe'a sé'a úwoi-waasin-owe siyáamba miwísáfé'a kesí waásin-owe sendasáfé'a aaisambá tiyé'a tirunkó sáwí'a uwátinkainiye

Maníkó siyáíye Mósesé agaimaréna siyówana

20 ánaaemba Áísáya ímba áá'a úwana agaimaréna séna Maníkó séna

nóra símaisaawa Maníkómpá'á ténaumno-aai ímba sewífá'á paápé uráumne. Maníkómbá aráásíméro-aai ímba sewífá'á paápé uráumne séna

21 Ísareri-waasisafena séna túwa'nai ónaumne sé'a kempá'á teró símae'a iyúnasa kesáái taraisésa kembá tínaaeni'a wéowe

Maníkó siyáíye Áísáya agaimaréna siyáíye.

11

Maníkó Ísareri-waasi arumbó uwátínkáín-aai.

¹ Simátíménda ísáaro. Érai'a Maníkó wení waási Yúndaa-waasi ímba ánaaemba tímakaiye. Kemá Yúndaa-waasifinkemba é'a Ísareri-waasi é'a Émbaramun-aísaafitantambo úndawi é'a Pénisaminin-andafakewi úne.

² Naaófá'á Maníkó Yúndaa-waasi wemparí'a úmarena ánaaemba ímba ti'mátukaiye. Íráiyaa-aai agaimakáimba ísaraawe. Naaófá'á Íráiyaa Ísareri-waasisafena í'ai séna Maníkóntáféna séna

³ Fasi'aénkóo enáái simátímakaawifinkemba sáwífa'nanka tínkamuwasa púwúwasa óntan-taarema tawísísuwesa entáfésamo imáyáamo ésamo póimo tufú'maimo agaimaráán-taarema tawísísukaawe. Enááimo simátímakaawifinkemba keyáá méraunda pósa kenkwará'á sínkamonaawe

Íráiyaa súwana

⁴ Maníkó simámena séna ímbanifo kesí waási méraiyyantafena sáwífa'nanka 7,000 waasi ta'ótokaunasa

karo'-máníkón-áwí'o Péárimba wenáwí'a ímba mósá makáawe Maníkó simámakaiye.

⁵ Miyámó uráintemba kífé'wara'a Maníkó arumbá uwátínkáíwaisafena Yúndaa-waasifinkemba tuwímbai wemparí'a úmakaisasa méraawe.

⁶ Miwítí kísausafena ímba wemparí'a úmakaifo arumbá uwátinkenafena wemparí'a úmakaiye. Miwímó kawé-kísáúmó maiyáawin-anondaa ímba wemparí'a úmakaifo wemá arumbá uwátinkenafena wemparí'a úmakaiye.

7 Miyáumai Ísareri-waasi Yúndaa-waasi Maníkómó wenaúranka'o arupísemo uwátínkáín-amba saafá uwááesa owasá seyaafá'nánká ímba awánaraafo Maníkómó wemparí'o úmakaiwai tuwímbai awánaraawe. Maníkó táántaraimba táá-kautan-kwaasiyaamba ésa ímba isááwasa tuwímbai ísaraawe.

8 Naaófá'á Maníkón-aai aúfáífimba agaimaréna séna

Maníkó séna tuwesaraí uwátinkaumne súwana
tuwesaraí úwasa ímba kanaa'á aai
ísaraamba miyámó uráantemba ífé'wara'a
miyá wéowe

agaimaréna siyáísana

9 Téfíti agaimaréna séna

tóntáfesa aantemba óraa'-imayaa ésa sésa
kawe'-úmaisa méraumne síyambanifo
minímáyáágó karo'á simátinkainasa sáwí'a
úmai mésa sáwí-meyamba maénááwe.

10 Miwí túramba kafíkurainasaraamba ímba awánanááwe. Miwítí umbai-tántáákó waé'wae'a éna ímba tai'áíníye

Téfíti siyáíye.

11 Mináái imáyáa é'a simátíménda isáaro. Yúndaa-waasi karo'-ámbá arááiwaémbanifo ánaaemba ímba miyá ónááwe. Yúndaa-waasi Maníkón-aai taráíyaanka'a fí'onkaa-waasi Maníkómó sáwí'o úmaimo méraampinkemba kawe'-ámpá'ó métínkáín-aai isésa érai'e sembá Yúndaa-waasi isésa tirunkó sáwí'a ínasa kewárátá miyáumai arááiwaenae sénááwe.

12 Yúndaa-waasi sáwí'a ésa sáwí-amba arááiwaémba mindásafesa fí'onkaa-waasi kawe'-ámbá arááiwaesa kawe'-úmai méraawe.

Miyáumai ánaaemba Yúndaa-waasi Ísu Káráísitin-aaisafesa érai'e sésa kawel-ámbó arááíwaiyamba sáwífa'nanka tuwánésa áfááraumai kawel-úmai ménaawe.

Fí'onkaa-waasi kawel-ámpá'ó métínkáín-aai.

¹³ Ímba Yúndaa-waasin-oho fí'onkaa-waasisafe'a imáyáa é'ó simátíménda ísáaro. Maníkó kentáféna séna fí'onkaa-waasi kesáái kosimátíma'mae núwo séna si'mákaimba minkísáú óraa-kisaun-ye sune.

¹⁴ Fí'onkaa-waasi simátimunda imáyáa é'a kesí waási Yúndaa-waasi isáiyana tirunkó sáwí'a ínasa kewárátá miyáumai arááíwaenae sénááwe-imayaa úne. Yúndaa-waasi miyá íyana Maníkó kawel-ámpá'á métinkaindasafe'a fí'onkaa-waasi simátíma'mae'a iyúne.

¹⁵ Maníkó Yúndaa-waasi ánaaemba uwátímakainka'a fí'onkaa-waasi sáwífa'nanka wení waási-i'a uwátínkaraisasa miyáumai ánaaemba Yúndaa-waasi Maníkómpá'á tíyana Ísu Káráísitini waási-i'a uwátinkainda pukésa íyáfasinesaraamba ónááwe.

¹⁶ Yúndaa-waasisafe'a imáyáa é'ó simátíménda ísáaro. Tuwímbaimo tómbó ayááímó tafámbaimo Maníkómbó amémba mintómbá mútú'a Maníkóndén-ye. Tuwímbaimo sésa mintáí-ánú'á Maníkóndén-ye sembá mintáíma seyafá'á wendén-ye.

¹⁷ Moórá-taigon-awí'a órífima kisaufa'a wérain-taima mintáíyáámbá Yúndaa-waasin-owe. Maníkó minórífí-táígó ayáánamai

anai'uwásuwena amo'náfakemba afáá'-órífé-táígó ayáánamai anai'úmai máafusu'maraisana áfóiyaken-anomba tasiséna óraa'a uráíye. Afáá'-órífé-táígó ayáánamaiyaamba kemá fi'onkaa-waasin-owe.

¹⁸ Mindásafe'a kentúwí'a ímba maimaé iyé'a anai'uwásukain-ayaanamaisafe'a sáwísamba owatá kesáá óraa'a úne ímba seró. Mintáígó fasi'aémbá wétimifo kembiwí mintáígómbá ímba fasi'aémbá wéamefo kentúwí'a ímba maimaé iyóro.

¹⁹ Kentúwí'a ímba mósá maré'a sé'a Maníkó kentáá máafusu'maraindasafena ayáánamai anai'uwásukaiye ímba seró.

²⁰ Maarán-áái érai'-aain-iyé. Yúndaa-waasi Ísu Káraísitin-aaisafesa ímba timankúnkúmba untáféna anai'uwásukaisa'a kembiwí timankúnkúmba uráantafena miwí-tínóndáá méraawe. Mindásafe'a ímba kentúwí'a mósá máréwana táá'a ína'a káráwiyoro.

²¹ Yúndaa-waasi ayáánamai-úramban-oyo Ísu Káraísitin-aaisafesa ímba timankúnkúmba ontáféna anai'uwásúwáísasa méraamba pó'a kembiwímó miyámó íyanamo éna Maníkó miyá íníye.

²² Maníkó tuwímbai arumbá uwátinkena tuwímbai sáwí-meyambo timínda imáyáan-oro. Sáwí'o uráawi sáwí-meyamba tiména kembá kawelá uwátínkáíye. Kaweló uwátínkáípa'o ímbo maé'mae'o íyanamo éna ayáánamaimo anai'uwásukaintemba kembiwí miyá íníye.

²³ Yúndaa-waasimo sáwí-ambo tuwésamo Ísu Káraísitin-aaisafesa timankúnkúmba íyanamo

éna Maníkó fasi'aémbó tokáiwai tiyéna ááémo
maé'ópa'a mótinkainiye.

24 Fí'onkaa-waasi afáá'-órífí-táígó
ayáánamaiyaamba owaná Maníkó
anai'uwásuwena kawé'-órífí-táífimbá
máafusu'makaimba mindá umbaí taráíye.
Yúndaa-waasi kawé'-órífí-táíyáámbá
owaná Maníkó minkáwé-táígó ayáánamai
anai'uwásukaifo aneka'á maimái Yúndaa-waasi
máafusu'marainda mindá imba umbaí táinda
kanaa'á íníye.

*Maníkó seyaafá'nánká arumbó uwátínkáin-
aai.*

25 Kesí waásisono. Kesáá óraa'-waasisa
úne súnafo sé'a afora'ó simátíménda isáaro.
Ísareri-waasi Ísu Káráisitín-aaisafesa imba
timankúnkúmba ombánifo imba miyá úmae
iyésa ánaaembo fí'onkaa-waasimo Maníkómó
wemparí'o úmakaiwaimo Maníkómpá'ó
tíyanka'a Ísareri-waasi Ísu Káráisitín-aaisafesa
timankúnkúmba ónááwe.

26 Miyáumai Maníkó Ísareri-waasi sáwí'o
úmaimo méraampinkemba kawé'-ámpá'á
métinkainiye. Mindásafena naaófá'á Maníkón-
aai aúfáífimba agaimaréna séna

sáwí'o úmaimo méraampinkemba kawé'-ámpá'ó
métínkáíwai Sáíyóni-naopa'a paápé éna
Yékopun-aísaafitantamba uráawiti sáwí-
imayaa maitiyuwáíníye.

27 Sáwí-imayaa maitiyúwáandara'a símaimo
kááísamakaunda-aai paápé íníye Maníkó siyáíye

agaimaréna Ísareri-waasi Yékopun-aísaafitantambo uráawisafenawe miwítí óraa'-naopa'-awi'a Sáíyóni-naopatafenawe agaimaréna siyáíye.

28 Yúndaa-waasifinkemba sáwífa'nanka Ísu Káraísitin-aai taráíyaamba pósa Maníkóni namuro-wáásíyáámbá ompínkémbá fí'onkaa-waasi wenáái isé'a érai'e siyáawe. Yúndaa-waasi tíwá'náma Maníkó símai kááísamakaintafena miwí tísaafitantambo uráawi wení waási-i'a úmakaiye.

29 Maníkó wení waási-i'a úmakena kawé'á uwátínkaraimba ímba ifátuwena fí'on-imayaa íníye.

30 Ááéma kemá fí'onkaa-waasi Maníkón-aai taráíyaawasa ánaaemba Yúndaa-waasi miyá uráamba póna káfé'a Maníkó kembiwí arumbá wéuwatinkaiye.

31 Yúndaa-waasi Maníkón-aai taráíyaawana kembiwímó arumbó uwátínkáintemba ánaaemba miwí arumbá uwátinkainiye.

32 Seyaafá'nánká Maníkón-aai taráísúwana Maníkó séna sáwí'o ombá miwá ta'ótokaiye séna arumbó uwátinkaindasafena mináái siyáíye.

Maníkón-áwí'a óraataamo úmae iyúnda-aai.

33 Maníkó áfááraumai arumbá uwátinkena kawé'-ímáyáá éna seyaafá-tántáátáféna imáyáa isaná miyám-baaran-aaimo Maníkómpá'ó wéraitimba ímba kanaatá isáúnanasa miyám-baaran-kisaumo máimba ímba kanaatá wéawanaumne.

34 Maníkón-aai aúfáifimba agaimaréna séna
Fasi'aénkómó imáyáamo imbá ímba kanaa'á
wéisaawe. Fasi'aénkómó máin-kisau ímba
kanaa'á táísái úmai wémaewe.

35 Moórá-tantaa'a simíya'a kemá anondáá
tíménoma ímbo siwái póna wemá ísarena
tímiwain-iyé

agaimaréna siyáíye.

36 Maníkó seyaafá-tántáá'á úmáráísana wení
fasi'aémbá wéraintafena seyaafá-tántáá'á
wéraimba pósa wenáwí'o mósá maráiyantafena
seyaafá-tántáá'á wéraiye. Mindásafeta
Maníkómó kisaumo máimba ímba kanaatá
seyaafá'á wéawanaumpo kárikata wéawanaumne.
Wenáwí'o óraa'o úmae íyimba érai'-aain-iyé.

12

Maníkóní kisaumo máén-aai.

¹ Kesí waásisono. Maníkó áfááraumai arumbó
uwátínkáintafe'a maarán-áái óraaka simátimune.
Kembíwí kentúma Maníkómbá amé'a wentáfé'a
imáyáa é'a wení kísau aantemba máiyana aamoí
uwátinkaino. Miyámó é'o é'a wen-imáyáá érai'a
mósá maránááwe.

² Marapá'-waásímó sáwí'o ontembá ímba
miyámó íyamba Maníkómó sin-ááisáfé'a ewé
síyana kentí imáyáa aúí'a uwátinkaina'a
aú-waasiyaamba ónááwe. Miyámó é'o é'a
Maníkómbó arááímo tain-áái isé'a Maníkómó
aamoimó in-áái isé'a kawé-kísáú-áái isé'a wení
sásá'-imáyáámó imbá isánááwe.

³ Maníkó úwoimo súwa'nai uráintafe'a maarán-
áái simátimune. Kentúma ímba maimaé iyé'a

óraqa'-waasisa úne ímba seró. Maníkó túwa'nai isa'á ímba waásiti fasi'aénká'án-ifo Maníkóní fasi'aénká'á wení kisaumo máemba mindásafe'a imáyáa é'a kentúma ímba maimaé iyóro.

⁴ Kentúwawaa'a imáyáan-oro. Tíyayaanko wení kísau máisana moórá-mora-tantaako miyá isatá

⁵ miyáumai kesáá sáwífa'-waasi méta Ísu Káraísitiyeta kááísamaisa mimbórá-súwawaa'a ma'máisa méraunanasa

⁶ Maníkó úwoi súwa'nai isatá moórá-mora-waasisa kentáásí kisausa máéndasafenasa Maníkó fasi'aémbá siménasa Maníkó fasi'aémbó timénamo kesáái simátíma'mae nóromo siyáinda érai'-aain-iye sé'a miyán-oro.

⁷ Fasi'aémbó timénamo túwa'nai orómó siyáindawi miyán-oro. Fasi'aémbó timénamo kesí aambó aráátíméromo siyáindawi miyán-oro.

⁸ Fasi'aémbó timénamo fasi'átínkáaromo siyáindawi miyán-oro. Kentí óntamo tuwímbaimo tíméwi kawe'án-ofo miyán-oro. Kárawiyaawi kawe'án-ofo miyán-oro. Kawe'ó uwátínkááwi aamoimó íyapakemba miyán-oro.

⁹ Moórá-moramo tirumbó tímémba ímba karo'ó síyamba éraika'a tirumbá tíméro. Sáwí-kisau tínaemba uwáme'a kawe-kísáu ta'ótóráaro.

¹⁰ Ísu Káraísitini waási ontáfé'a mimbórá-ákúnkáání'a é'a pó'a moórá-mora-waasi tirumbá tímé'a moórá-mora-waasi túwí'a mósá máraámba aamoí é'a méraaro.

¹¹ Fasi'aénkómpá'á imáyáa é'a ímba tuwe-sarai ína'a tiyáántán-kwimái Fasi'aénkóní kísau kawe'án-oro.

¹² Ísu Káraísitimo kumíndasafe'o amu'maré'o méraamba tirunkó aamoí ínana umbai-tántáá'ó

kentópa'o wéraimba ímba imáyáamo íyamba fasi'ámai mé'a Maníkómpá'á inai símae iyé'a ímba saagaaró.

¹³ Maníkóní waási ímbo tómbó makéwi túwa'nai e'a namu'-waasímó tíya'o é'a tóné naané tíméro.

¹⁴ Sáwí'o uwátínkááwisafe'a Maníkóntáfé'a sáwí'a uwátinkaaó ímba síyamba kawel'á uwátinkaaó seró.

¹⁵ Aamoimó owísé'a kewará'á aamoín-oro. Ifi'ó taawísé'a kewará'á ifi'á taaró.

¹⁶ Mimbórá-ímáyáá é'a óraa'-waasisa úne ímba síyamba moórá-mora-waasi túwa'nai e'a úwoi-kisauwara'a máero. Kesáfé-ímáyáámó ombá keyáása kawel'-ímáyááwára'-wáásísá úne ímba seró.

¹⁷ Sáwí'o uwátínkarewa'o é'a anondáá ímba miyá uwátínkáaro. Waási túranka'a kawel'-aantemba úmai méraaro.

¹⁸ Seyaafá'-wáásífímbá faru úmai ménae sé'a tiyáántán-kwimái miyáumai méraaro.

¹⁹ Sáwí'o uwátinkaiya'o é'a anondáá ímba miyá íyamba méwana Maníkó anondáá sáwí-meyamba timíníye. Mindásafena Maníkón-aai aúfáífimba agaimaréna séna

Fasi'aénkó séna sáwí'o íyawini anondáá-meyambo tímenda mindá kendén-íye. Sáwí-kisausafe'a méyámbá timénaumne siyáíye

agaimaréna siyáíye.

²⁰ Mináái imáyáá é'a maarán-oro. Maníkón-aai aúfáífimba agaimaréna séna

namuro-waásímó tááimo taimbó é'a tómbá tíméro. Namuro-waásímó nontáfénamo

tínkáímbo é'a tíméro. Miyámó íyasamo ésa
sáwí'o uwátínkáántafesa tigaemá íníye
agaimaréna siyáíye.

²¹ Sáwí'o owíní áwáuma ímba íyáákainifo kenti
kawe-kísáúgó sáwí-kisauomba íyáákaino.

13

Káráwiyaan-kwaasi tísamaifimba kífaero-aai.

¹ Seyaafá'nánká marapá'ó káráwiyaan-oraa'-
waasi tísamaifimba kífaero. Maníkómó fasi'aémbó
ímbo tímakainkakaa ímba káráwiyon-kisau
máéwaisino. Maníkó miyáumaimo káráwiyaawi
íyáfasintinkaraiye.

² Marapá'ó káráwiyaan-oraa'-waasi Maníkó
íyáfasintinkaimba pó'a miwí táái isé'a ímba
taráisóro. Taraisíyambo é'a Maníkón-aúranka'a
sáwí'a é'a sáwí-meyamba maénááwe.

³ Kawe'ó owí káráwiyaan-oraa'-waasisafena
ímba táá'a wéifo sáwí'o owí káráwiyaan-oraa'-
waasi táároi wéinkaisowe. Káráwiyaan-oraa'-
waasi táároi ímba inkaisónaemo sé'o é'a kawe'-
aantemba íyasa aamoí uwátinkanaawe.

⁴ Káráwiyaan-oraa'-waasi túwa'nai íya'a
kawe'-úmaimo méraiyyantafena Maníkó miwí
íyáfasintinkaraiye. Sáwí'o é'o é'a miwí táároi
inkáísóro. Fasi'aémbá tokáamba pósa sáwí'o
íyawí sáwí-meyamba timénááfo inkáísóro.
Maníkó íyáfasintinkaraimba pósa sáwí'o owí
sáwí-meyamba timénááwe.

⁵ Mindásafe'a marapá'ó káráwiyaan-oraa'-
waasi tísamaifimba kífaero. Maníkó aaisambá
sífo sé'a káráwiyaan-oraa'-waasi tísamaifimba

kífaero. Ímba mindásafe aantembanifo kentirumpinkén-árúpísé-ímáyáásáfé'a káráwiyaan-oraa'-waasi tísamaifimba kífaero.

⁶ Miwí miyán-kísáúmó máémba miyán-kísáú maíyantafena Maníkó íyáfasintinkaraimba pó'a taakisi

⁷ fí'o-fi'on-takisi
orómó síya'a arupíse úmai miyá é'a óraa'-waasi-tuwi'a mósá máráaro.

Moórá-mora-waasifimba tirumbó tímén-aaí.

⁸ Óntambo tímakaiya'a ayáátáaka'a ímba mé'a ááéma tíméro. Moórá-mora-waasi tirumbá tímé'a miyámó ombá Maníkó Mósesembo simámakain-amaamba wéaraaiwaewe.

⁹ Maníkó Mósesembo simámakain-amaanko séna aare-úméné waai-úméné fí'o-fi'on-tantaa'e ímba oró. Ímba tínkamiyasa púwóro. Túraniyamba ímba oró. Miyám-baaran-amaankoni áwáuma maarán-íye.

Kesáfé-ímáyáámó ontembá
kentí waási-imayaawara'a oró.

¹⁰ Miwítí waási-imayaamo owí ímba sáwí'a uwátinkanaawe. Miwítí waásifimba tirumbó tíméwi Maníkó Mósesembo simámakain-amaamba wéaraaiwaewe.

¹¹ Ísu Káráisitimo kumínda-kanaa kárika'a tína'a Ísumo kumínda-kanaamo ímbo imáyáamo ontembá ímba é'a káráwiyoro. Ísu Káráisitin-aaisafeta érai'e séta simankúnkúmba uráundarata Maníkómó siyáínda-kanaa kárika'a tinda póta méraundasa káfé'a minkánáá kárika'a tíníye.

¹² Marapá'ó kumeu'-áémpá'ó méraamba tai'áimba pó'a kárika'a wíyómpa'o sámó kaipa'á ménaafo mindásafe'a sáwí-kisau tínaaemba uwáme'a tiyáántán-kwimái kawé-kísáú maé'a méraaro.

¹³ Sámó kain-áémpátáámó méraunda-waasisaamo úndantenta miyá é'a kawé'-úmai méraaro. Ímba túwaandu uré'a uwóí'o on-dómbá wéne'a uwóí'a oró. Aare-úméné waai-úméné ímba é'a aaisané ímba sé'a kawé-kísáúmó maiyantafe'a kentirunkó ímba símai sáwí'a uwátínkáaro.

¹⁴ Sáwí-imayaasafe'o tirááisafe'o ombá ímba ewé síyamba tínaaemba uwáme'a Fasi'aénkó Ísu Káráísitintafe'a sé'a kentáará'á káráwiyo seró.

14

Waásiti kisaugomba ímba símai sáwí'a oró-áái.

¹ Ísáaro. Ísu Káráísitin-aaisafesa timankúnkúmba ésamo ímbo fasi'ámaimo arááíwáéwisafe'a ímba tiyuwé'a keséta méraaro síyamba miwítí fí'o-fi'on-imayaasafe'a ímba aaisambá símai tuwínáaro.

² Ísu Káráísitin-aaisafesa timankúnkúmba owífínkémbá tuwímbai sésa seyaafá-tómbó náúndasa kanaán-iye sewasá tuwímbai Maníkóni aampa'ó ímbo fasi'ámaimo arááíwáéwi sésa kisaufaken-ton-aantemba néta póí-ama'a ínta nánaumne sewasá

³ seyaafá-tómbó naawí póí-ama'o ímbo naawísáfesa ímba símai sáwí'a uwátínkáaro. Wenááisafesa timankúnkúmba ésa póí-ama'o naawísáféna Maníkó séna kesí waásin-owe

siyáimba pósa kisaufaken-ton-aantembo naawí póí-ama'lo naawísáfésa sáwí'a wéowe ímba seró.

4 Moóráwigoni kisa-u-waasigontafe'a sáwí'a óne ímba seró. Ímba kendén-ifo wení óraa'-waasigonde póna weyááríka'a séna kawé-kísáú maé sáwí-kisau maé óne wení óraa'-waasigo wésiye. Fasi'aénkó kanaa'á áwa'nai índa póna kawé-kísáú maéna fasi'ámai méiniye.

5 Tuwímbai moórá-mora-kanaasafesa sésa óraa-kanaan-ifo seyaafá-kánáá úwoi-kanaan-iye sewasá tuwímbai sésa seyaafá-kánáá mimbórá-kánáarááni'an-iye wésewe. Seyaafá'nánká imáyáa ésa moórá-aaimo arupíse-aaimo sésamo ésa mináái miyán-oro. Tuwímbai moórá-aaimo arupíse-aaimo sésamo ésa mináái miyán-oro.

6 Tuwímbai Fasi'aénkón-áwí'a mósá maránae sésa moórá-kanaasafesa óraa-kanaan-iye sewasá tuwímbai Fasi'aénkón-áwí'a mósá maránae sésa tómbá Maníkómpá'á súwi sésa wénaawe. Tuwímbai Fasi'aénkón-áwí'a mósá maránae sésa tuwímbai-tontafesa ímba nánaumne sésa naan-tóntáfésa Maníkómpá'á súwi wésewe.

7 Métaamo púwóndasaawe ímba kendésáánifo Maníkóndén-iye.

8 Méraundasa Fasi'aénkóntáféta imáyáa éta méraunda póta púwóndasa Fasi'aénkóntáféta imáyáa éta puwónaumne. Méraundasaawe púwóndasaawe Fasi'aénkóndé-ita wéune.

9 Ísu Káráísiti pukáan-kwaasiya'e úwoimo túmó aráan-kwaasiya'e káráwiindasafena pukéna íyáfasinkaiye.

10 Mindásafe'a imáyáa é'a Ísu Káráísitini

waási ontáfé'a moórá-mora-waasiti kísau ímba tuwiné'a sáwí'a uwátínkáaro. Maníkó seyaafá'nánká méraawini áwáuma tísai índara'a Maníkón-aúranka'a seyaafá'nánkátá méraundasafenasa póna sísai índasafe'a mindásafe'a waásiti kisaugomba ímba símai sáwí'an-oro.

¹¹ Minááisáféna Maníkón-aai aúfáifimba agaimaréna séna

Fasi'aénkó séna méraundasafe'a sé'a kesúranka'a seyaafá'nánká kífaesa ken-ímáyáá mósá marésa afora'á sésa érai'a emá Maníkó óne sénááwe Maníkó siyáíye

agaimaréna siyáíye.

¹² Miyáumai minkánaámó tínda Maníkón-aúranka'a seyaafá'nánkátá kesáámó méraundawini áwáusa simámenaumne.

Kentáásí kisaugoni aambá kawe'-án-aantemba awánésa ímba sáwí-ambo arááíwaiwae siyáin-aai.

¹³ Mindásafeta imáyáa éta moórá-mora-waasiti kísau ímba tuwiné'ta sáwí'a uwátínkáafo maarán-ímáyáa éta séta kesí waási kesí kísau awánésa sáwí'a óne sefáínifo kawe'-aantemba ónae séta miyásá ónaumne.

¹⁴ Fasi'aénkó Ísuwe'a kááísamai méraunda pó'a maarán-áái érai'-aain-iye ísaraumne. Seyaafá-tómbá wéraimba ímba sáwí'a isasá náíyanamo éna ímba sáwí'a uwátinkainifo karo'ó sésamo naananá sáwí'a uwásinkainiye sésamo náíyanamo éna sáwí'a uwátinkainiye.

¹⁵ Tuwímbaimo mintómbá ímba nánaumnemo sen-tómbó náíyasamo ésa minááímó sewí tuwánésa mintómbó náíyantafesa sáwí-amba arááíwaenaawe. Miyámó ombá sáwí'a é'a

tirumbá ímba wétimewe. Miyán-tómbó naambá miwísáfénawe séna Káráisiti pukáiwai tuwánésa sáwí-amba arááíwáéfo sé'a káráwiyoro.

16 Kawe-tántáá'án-ye sé'o ombá tuwímbai tuwánésa símai sáwí'a uwásínkááfo sé'a káráwiyoro.

17 Miyám-baaran-tone noné naawasá ímba naawasamó ombá ímba Maníkó kentáárá'ó káráwiyain-awaun-ifo Maníkó kentáárá'ó káráwiyaimba maarán-ye. Wenaúranka'a arupíse úmai aáno úmai méraunanasa Maníkóní Ufaen-ámútánkó súwa'nai isaná sirunkósá aamoí wéiye.

18 Miyámó ombá Ísu Káráisitini kísau máéwana Maníkó aamoí uwátínkáísasa tuwánésa sésa kawel'án-owe wésewe.

19 Mindásafeta imáyáa éta aáno úmaisa méta moórá-mora-waasi fasi'aémbá timénae séta siyáántán-kwimáísa kísausa máéno.

20 Tuwímbaimo karo'ó sésamo mintómbá naananasá sáwí'a uwásinkainiye sewa'ó ombá mintómbá nánae sé'o né'o ombá tuwánésa sáwí-amba arááíwáéfainifo káráwiyoro. Maníkómó kentirumpimbó máin-kisau gomba sáwí'a ifáínifo káráwiyoro. Seyaafá-tómbó naambá mindá kanaán-ifo tuwímbai-tombo naambó tuwánésa sáwí-amba arááíwáémba sáwí'a uwátínkáámba mindá sáwí'an-ye.

21 Póí-ama'e ándá-aran-done fí'o-fi'on-tone náúndamo suwánésa sáwí-amba arááíwáéfo sé'a miwísáfé'a imáyáa é'a mintómbó naambá ifátiyuwe'a miyámó ombá kawel'án-owe.

22 Mintántáátáfé'o imáyáamo ombá Maníkó

aantemba simáméro. Kentirumpinkén-ímáyáásámbó ombá ímba sáwí'a úne sefó kentirunkó kawé'ó iní'a wéowe.

²³ Tuwímbai-tontafe'a kae'-ímáyáá toké'a nánaum ína nánaumno sewí kentirumpinkén-ímáyáágó ímba naaó sína'o né'o é'a Maníkón-aúranka'a sáwí'a ónááwe. Kentirumpinkén-ímáyáágó kawé'an-íye ímbo

sisasamó miyámó ombá sáwí'a wéowe.

15

Ísumo ímbo wesáfé-ímáyáámó uráintemba miyán-oro-aaí.

¹ Kesáá Maníkómpá'ó simankúnkúmbó fasi'ámaisamo úndawisa Maníkómpá'ó timankúnkúmbó ímbo fasi'ámaimo owí túwa'naisa onó. Sirááimo taintembó úndasa aantemba ímba imáyáa éta

² kentáásí ewaa'ó méraawi Maníkómpá'á timankúnkúmba fasi'ámae íyantafeta miwísáfé'wará'á imáyáa éta túwa'naisa onó.

³ Ísu Káráisiti ímba wesáfé-ímáyáá úmba waásisafena imáyáa uráíye. Mindásafena naaófá'á Maníkón-aaí aúfáífimba agaimaréna séna Káráisiti Maníkóntáféna séna símai sáwí'o uwánkaraawi pósa kembá sáwí'a uwásínkaraawe siyáíye

agaimaréna siyáíye.

⁴ Naaófá'á Maníkón-aaí aúfáífimbo agaimakáamba maarán-ááísáfésa agaimakáawe. Súwa'nai ínanasa ímba ááéma suwesarái ínata Maníkón-aaísafeta fasi'ámai imáyáa éta

wesé'a ménaandasafeta amu'maréta méraumne.
Mindásafesa aúfái agaimakáawe.

⁵ Ímba tuwesaraí ina'a fasi'ámai méraaro
séna Maníkó túwa'nai iye. Ísu Káráisitimo
méraintemba miyáumai mé'a kempímbá
mimbórá-ímáyáán-oro séna Maníkó túwa'nai
isa'á

⁶ pó'a mimbórá-ímáyáá é'a mimbórá-áái sé'a
Maníkón-áwí'a Fasi'aénkó Ísu Káráisitín-afowán-
áwí'a mósá máraámba mindásafe'a inai sune.

*Ísu Ísareri-waasiye fí'onkaa-waasiyemo
túwa'nai uráin-aai.*

⁷ Ísu Káráisitimo kentáfénamo aamoimó in-
tembá kempímbá moórá-mora-waasisafe'a aamoí
é'a miyá owaná Maníkón-áwí'a óraa'a wéiye.

⁸ Naaófá'á Maníkó Yúndaa-waasisa
síwá'násafenasa símai fasi'ámarowana Maníkómó
siyáintembo índasafena mifási'áén-ááímó paápé
índasafena Ísu Káráisiti kumbéna Yúndaa-waasi
túwa'nai úwasa

⁹ fí'onkaa-waasi sésa Maníkó arumbá
uwásínkáísata wenáwí'a mósá maráúmne
síyantafena Ísu Káráisiti kunkáiyé. Minááísáféna
Maníkón-aai aúfáifimba agaimaréna séna
fí'onkaa-waasifimbo méraunda enáwí'a mósá
maré'a imó sunda enáwí'a mósá
maráúmne

agaimaréna súwana

¹⁰ moóráfa'a agaimaréna séna
fí'onkaa-waasisono. Maníkómó wemparí'o
úmakaiwai tirunkó aamoí ina'a
kentirunkówárá'á aamoí íno
agaimaréna súwana

11 moóráfa'a agaimaréna séna
fi'onkaa-waasisono. Fasi'aénkón-áwí'a
mósá máráaro. Seyaafá'-wáásísé'a
wenáwí'a mósa máráaro
agaimaréna súwana

12 Maníkón-aai simátímakowin-awí'a Áísáya
agaimaréna séna
Téfítin-afowan-awí'a Yési wenándáfakemba
moóráwigo paápé ínana fi'onkaa-
waasiya'o káráwiyindasafena Maníkó
íyáfasinankainasa wembá amu'maréna
ménaawe

agaimaréna Ísu Káráísitintafena siyáíye.

13 Wesé'o méraiyaamba amu'maré'a méraaro
séna Maníkó wétuwa'nai-íye. Wesé'a kááísamai
méraantafena aáo uwátinkena tirumbá
kawe'á uwátínkáísana wení Ufaen-ámútánkó
fasi'átinkáfa'a íyísa'a wesé'o méraiyaamba
amu'maré'a méraamba mindásafe'a inai sune.

*Maníkóní kisaumo maúndasafe'a aamoí únemo
siyáin-aai.*

14 Kesí waásisono. Imáyáamo únda-aaimo
simátíménda ísáaro. Kawe'-wáási-úramba pó'a
kawe'-ámbó arááiwaén-aai seyaafá'nánká ísé'a
kanaa'á wéaraatimewe. Kentáfé'a miyán-ímáyáá
úne.

15-16 Maanáúfáífimbá tuwímbai-aai fasi'ámaimo
simátimunda mináái imáyáa íyantafena
imba sáa'a isa'a sune. Fí'onkaa-waasifimba
Ísu Káráísitini kisaú máéndasafena Maníkó
si'mákaimba póna imba sáa'a isa'a fasi'ámai
maanáuúfáífimbá simátimune. Maníkóntáfé'a
sé'a maafi'ónkáá-wáási ení waási owaná ení
Ufaen-ámútánkó ení waási-i'a uwátínkaraiye

senaná Maníkó aamoimó índasafe'a wení ásé-aai simátimune.

¹⁷ Ísu Káráisitiye'a kááísamai mé'a Maníkóní kísau maúndasafe'a aamoí úne.

¹⁸ Ísu Káráisiti fasi'aén-ímáyáá símísa'a fí'onkaa-waasi Maníkón-aaisafesa érai'e síyantafe'a kísau miwífimbá maiyáunda mináái ímba sáá'a ína'a pó'a simátíménda ísáaro. Aai simátíme'a kísau mo maiyáunda

¹⁹ Maníkóní ámutanko fasi'aémbá símísa'a fí'o-fi'on-kísau ímbo awánaraan-kísau maimaé'a kuráumne. Yérúsaremu-naopakemba fí'o-fi'on-daopa'a wéne'a Káráisitini ásé-aai simátíma'mae'a iyé'a Írírikamu-marafa'a kuráumne.

²⁰ Kemá sé'a naaó'-nao'a Ísu Káráisitín-aaimo ímbo ísaraan-daopa'a ásé-aai kosimátimenae. Kosimátímakaan-kwaasifimba ímba kosimátimenaumpo fí'on-daopimpa'a kosimátíma'mae'a nónaumne sé'a minásé-áái ímbo ísaraan-kwaasifimba kosimátímakaumne.

²¹ Naaófá'á Maníkón-aai

aúfáífimba miyán-áái agaimaréna séna

ímbo simátímúwasamo ísaraawi ánaaemba Maníkóní aambá awánánááwe. Ímbo ísaraawi ánaaemba Maníkón-aai isánááwe

agaimaréna siyáimba pó'a Ísu Káráisitín-aaimo ímbo ísaraan-kwaasifimba kosimátímakaumne.

Rómu-naopa'a kónaemo siyáin-aai.

²² Ímbo ísaraan-kwaasi ásé-aai simátimundara'a kempá'á kónae sé'a únda simátimunda-kisaugo sáwífa-kanaa kembá ta'ótokaiye.

23 Kempá'á kónae sé'a únda sáwífa'-aatai maisuwé'a ímba kanaa'á kúndasafe'a káfé'a maandáópimpa'a kesí kísau tai'ásuwe'a

24 kempá'á kónae-imayaa úne. Sípéni-marafa'e sé'a wéme'a kentí naaópa'a kotuwáné'a koméraana'a súwa'nai íya'a Sípéni-marafa'a kónaumne.

25 Aifa'á Yérúsaremu-naopa'a Maníkóní waási kotúwa'nai ónaumne.

26 Maníkóní waási Máséndóniyaa-marafakewiye Ákáyaa-marafakewiye sésa aawai taisasá Maníkóní waási Yérúsaremu-naopakewi tómbá ímbo makáawi túwa'nai ónae sésa miwítí óntamba torupámakaamba pósa simíya'a maimaé'a Yérúsaremufa'a wé'a mátimenaumne.

27 Miwítí imáyáafinkembo miyámó ombá mindá kawe'án-iyé. Yúndaa-waasi fí'onkaa-waasi Ísu Káráísitin-aaí kosimátímakaamba pósa imáyáa ésa miwítí óntamba Yúndaa-waasi tómbá ímbo makáawimo tímémba mindá kawe'án-oyo miyán-oro.

28 Torupámakaan-ontamba maimaé'a wéme'a seyaafá'nánká mátime'a Sípéni-marafa'e sé'a wéme'a kentí naaó'a kómé'a minkákémbá Sípéni-marafa'a kónaumne.

29 Kentí naaópa'a koméeraanana Ísu Káráísiti áfááraumai kawe'á uwátinkainiye-imayaa úne.

30 Kesí waásisono. Kentáásí Fasi'aénkó Ísu Káráísitintafe'a imáyáa é'a Maníkóní ámútanko arumbá uwásínkáintafe'a imáyáa é'a óraaka simátime'a súne. Maníkómpá'á inai sumpo kewará'á súwa'nai úmai fasi'ámai inai seró súne.

31 Yérúsaremu-naopa'lo kondá Yúndiyaa-aempaken-Yundaa-waasi Ísu Káráisitín-aaisafesa ímba érai'emo sewí sínkamofó sé'a súwa'nai úmai inái seró. Mifá'á Maníkóní waásimo méraawi túwa'nai on-óntántáfesa aamoí iyantafe'a inái seró.

32 Minkísáú taí'ásuwaanana Maníkómó ewémó sína'lo é'a aamoí é'a kentópa'a wémela ko-tuwáné'a aúí'a úmai ménaumne.

33 Maníkó aáno'lo uwásínkáíwaisa kesé'a méraiye sé'a inái súnda érai'-aain-ye.

16

Kawe'-úmai méraaromo siyáin-ai.

1 Moórá-ininkon-awi'a Fípi kesímánaakaanta éna Maníkóní waási Sénkíriyaa-naopakewi túwa'nai isa'á wenáái simátimune.

2 Kesé wesé'a Fasi'aénkóní waási ontáfé'a kentópa'lo wínda aamoí uwánke'a keséta méraao sé'a tuwímbai-tantaa'lo wempímbó ímbo wérainda áwa'nai oro. Sávífa'nanka túwa'nai ena kenkwará'ó súwa'nai intáfé'a pó'a áwa'nai oro.

3 Moórá-ininkon-awi'a Pírísiraawe awaaikón-áwí'a Ákwíraante'a kawe'-úmai méraakaiyo sune. Mindáraiye kewé Ísu Káráisitini kisausa wémaumne.

4 Ááéma sínkamiyakai puwúyafó-imayaa ímba ésarai súwa'nai uráaya'a aamoí uwátinkaumne. Ímba ke aantemba aamoí uwátinkaumpo fí'onkaa-waasi fí'o-fí'om-barafakewi Maníkóní waásiwara'a aamoí wéuwatinkaawe.

5 Mindáraití naaúmpa'a Maníkón-ímáyáá ésa túwaandu owísáfé'a kawé'-úmai méraaro sune.

Moóráwígon-awí'a Épínitasi kesí waási-i'a íntáfé'a kawé'-úmai méraao sune. Wemá Ésiyaa-marafakewi aifa'á Ísu Káráisitín-aaisafena amankúnkúmba uráiwain-iye.

6 Moórá-ininkon-awí'a Máriyaantafe'a kawé'-úmai méraao sune. Wemá kentáféna imáyáá éna óraa-kisau wémaiye.

7 Kae'-Yúndáá-wáásí túwí'a Ándónaikasiye Yúniyasintetafe'a kawé'-úmai méraakaiyo sune. Kemá Ísu Káráisitiye'a ímba kááísamai méraawandara'a mindárai-nonkaamba kááísamai maé'óyambani. Ísuni aantá-waasisomba minkáé'nárai tuwánaraan-kwaasiyai ésarai ááéma kesé'a ándáfa'a kuráaye.

8 Moóráwigo Ámpíríyetasintafe'a kawé'-úmai méraao sune. Wemá kesí waási-i'a éna Fasi'aénkóe'a kááísamai méraiye.

9 Moórá Épáanintafe'a kawé'-úmai méraao sune. Wemá kesé'a Ísu Káráisitíni kísaurai wémauye. Moóráwigo kesí waási-i'a iwáín-áwí'a Sítékisintafe'a kawé'-úmai méraao sune.

10 Moóráwigo Ápérísi Ísu Káráisitíni aampa'á fasi'ámai arááíwáíwaintafe'a kawé'-úmai méraao sune. Árisítopurasini akúntáfé'a kawé'-úmai méraaro sune.

11 Moórá Yúndaa-waasigon-awí'a Érotiyonintafe'a Násísáasini akúmbá Ísu Káráisitíni waásisafe'a kawé'-úmai méraaro sune.

12 Moóráwigo Táráífinae moóráwigo Táráífosaye mindárai Fasi'aénkóní kísau wémaeyawisafe'a kawel'-úmai méraakaiyo sune. Moóráwigo Pésisi Fasi'aénkó Ísuntafena imáyáa éna óraa-kisau wémaiwaintafe'a kawel'-úmai méraao sune.

13 Moóráwigo Rúfaasi Ísu Káráísitini kisaumo maénamo íyáákaraiwainte anówa kesinóraamba uráin-ininkontafe'a kawel'-úmai méraakaiyo sune.

14 Tuwímbai-tuwi'a Ásínkiritasiye Fírígoniye Émisiye Pátáropasiye Émásiye miwísé'a Fasi'aénkóní waási méraawisafe'a kawel'-úmai méraaro sune.

15 Tuwímbai-tuwi'a Fírórógasiye Yúriyaawe Nériyasiye wenamáánaakowe Órímpasiye miwísé'a Maníkóní waási méraawisafe'a kawel'-úmai méraaro sune.

16 Kempínkémbá moóra-mora-waasi imáyáa é'a tiyáamba tíméro. Ísu Káráísitini waási seyaafá'nánká kentáfésa sésa kawel'-úmai méraaro sewé.

17 Kesí waásisono. Maarán-áái óraaka simátimune. Tuwímbai simátímakaunda-aai ímba arááiwaesa sésa karo'-áái simátíméwasa isésa tuwínkaa'-ésa tuwímbai kawel'-ámbá tuwésa sáwí-ampa'a wégowe. Káráwiye'a miyán-kwáási tínaaemba uwátíméro.

18 Miyán-kwáási kentáási Fasi'aénkó Ísu Káráísitini kísau ímba maésa sáwí-imayaasafesa tirááisafesamo on-kísáú maésa karo'á simátinkanae sésa aai simátimesa símai tirumbá faiyarááwasa ímbo kawel'ó úmimo aaimó ísááwi minkáro'-ááisáfésa érai'e wésewe.

19 Kembiwímó ásé-aaimo fasi'ámaimo taawiyáfón-aai seyaafá'nánká ísáántafe'a imáyáa é'a aamoí uwátinkaumne. Kawe-kísáúsáfé'a imáyáa úmae iyé'a sáwí-kisausafe'a ímba imáyáa ombá mindá sirááíma wétaiye.

20 Maníkó aáno'o uwásínkáíwaisa túwa'nai ína'a kárika'a waántáwankomba iyáákanaawe. Kentáásí Fasi'aénkó Ísu úwoi túwa'nai úmae íyíntafe'a ínaí súne.

21 Kesé'a kisaumo máíwain-awi'a Tímóti kawe'-úmai méraaro siyé. Tuwímbai-Yundaa-waasi-tuwi'a Rúsiyasiye Yésóniye Sósipataawe kawe'-úmai

méraaro sewé.

22 Kemá Tétiyasi Póro sin-áái maanáúfái agaé'a kembiwísé kesé'a Fasi'aénkóní waási úndasafe'a kawe'-úmai méraaro súne.

23 Moóráwigon-awi'a Káyási kawe'-úmai méraaro siyé. Wení naaúmpa'a wéwaunasa Maníkóntáfésa imáyáa on-kwáásí mindáúmpá'á túwaandu wéowe. Moóráwigon-awi'a Érásítasi wení naaópakewiti óntanka'a káráwiyaiwai kawe'-úmai méraaro siyé. Moóráwigon-awi'a Kótasi Maníkóní waásigo kawe'-úmai méraaro siyé.

24 Kentáásí Fasi'aénkó Ísu Káraísiti úwoi túwa'nai úmaena íyímbe érai'-aain-iyé sé'a ínaí súne.

25 Maníkón-áwí'a óraa'a úmae íyóno. Ísu Káráísitin-aai ásé-aai simátimun-aai ísare'a érai'e sembá póna Maníkó kanaa'á fasi'átínkáimba pó'a wenááísafe'a fasi'aén-ímáyáá wéowe. Naaófá'á Maníkó minásé-ááísá aúpá'á makówasa kentáá síwá'náwe miwí tísaafitantamba uráawiye minááígóní áwáuma ímba ísaraawe.

26 Maníkón-aai simátímakaawi mináái agaimakáawe. Maníkó maé'mae'o iwái káfé'a paápé íníye simbá pósa seyaafá'-márafákén-kwáásí minááígóní áwáuma isánááwe. Minááísáfésa timankúnkúmba ésa taawiyafiyantafena minááígóní áwáuma paápé uráíye.

27 Ísu Káráísitimo uráintafeta Maníkón-áwí'a óraa'a úmaeta wéiyune. Maníkó mimbórá-Máníkó ména weyáá seyaafá-tántáátáféna ísaraiwai wenáwí'a óraa'a úmaeta iyúndasa érai'-aain-iye.

Kemá Póro súnda-aai taí'áiye.

Aú-aaí símai kááísamakain-aaí
The New Testament in the Awiyaana language of
Papua New Guinea
Nupela Testamen long tokples Awiyaana

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

PDF generated using Haiola and XeLaTeX on 18 Mar 2025 from source files dated 31 Aug 2023

0dda5aa4-c019-59cf-b9ee-e1fd4762d49c